


671.4:29
6002
28

藝文志卷之十二
文詩

雜錄志卷之十二
災祥事考 儀賓 仙釋

平遙縣志

Kodak Color Control Patches



平遙縣志卷之十一下

藝文補遺目錄

金

汾州平遙縣葬枯骨碣銘

并序

李致堯

宋

超山神祝文

周燁

國朝

創建棲真庵碑記

朱之俊

建修養濟院碑記

梁潢

重修上巔山路碑記

黃汝鈺

禱雨告城隍文

陳以恂

兩賢侯祠記

康乃心

重修洪福寺記

薛所蘊

遍融和尚塔銘

并序

康乃心

創古陶中都河橋廟祠糾首姓名記

梁棟

藝文續編目錄

重修櫺星門記

無名

改升大學碑記

李理臨

重修賀蘭仙橋碑記

郭名京

補修石橋碑記

郝康

重建龍王廟記

德貴

重修金井樓記

趙謙德

遊超山記

郭興讓

再遊超山記

前人

夢遊超山記

前人

重修超山應潤侯祠記

前人

重修文昌閣碑記

德貴

宋孟曹玉山救水災文

郭興讓

冀張二氏救水災賢壽文

韓本晉

重修文廟碑記

梁述孔

重修城隍廟碑記

王佩鈺

平遙縣修城開濠記

冀唐封

冀毅齋墓表

王珪

增建義學碑記

閻泰和

重修文廟碑記

蔡亮茂

重修文昌閣碑記

徐繼畬

平遙縣築城開河記

并序

高錫琳

補修縣治誌

錫良

汪縣尊修古蹟培文風經費總碑記

趙煥

重修公館碑記

劉韻庚

烈婦郭羅氏墓表

無名

詩目錄

五言古

征西官屬送於陟陽侯作詩

孫楚

清虛觀遊仙詩

范道行

卽事寄秋香居士温先生

傅山

超山西莊

劉 峴

清虛閣

陸豹雯

丙戌四月五日雨

王 綬

棲真庵贈孫道人磐石

黃繼懋

七言古

權店山中遇雨見民穴居感賦

唐登雋

清虛觀三柏歌

張開宗

大風刮雲彌日雨又不果

王 綬

昭慶禪院贈相生上人

周 鐫

柏仙觀古柏歌

王 綬

古柏歌

陸豹雯

古柏行

康乃心

清虛閣仙跡

張開宗

公子行

康乃心

五言律

尹吉甫墓

韓邦奇

次平遙夜望二首

韓邦奇

次苑洛公韻

宋岳

和承山次苑洛韻

蔣勸能

早度上店嶺

宋岳

鳳凰臺

范道行

登麓臺山

李瀚

介之推廟

雷嘉祥

贈梁天一令臨穎

傅山

過棲真庵贈秘宗道人

許汝霖

棲真庵

陸光旭

棲真庵和鶴田韻二首

陸榮登

棲真庵次韻

王傑

棲真庵次鶴田韻八首

王綬

棲真庵贈秘宗道人次鶴田韻

康乃心

超山二首

康乃心

超山二首

劉嶠

和康太乙劉豫山遊超山二首

王綬

棲真庵訪秘宗鍊師

陸豹雯

縣署中喜晤康太乙

張增慶

登清虛閣

王綬

胡邨柏

劉岷

超山幽居二首

際得

棲真庵和前韻

喬燧

棲真庵和前韻

梁爾慤

棲真庵和前韻

梁搏

張伯始以清虛閣仙跡詩見寄率成一首

王綬

西河書院贈劉孝廉豫山

張增慶

和劉思齋先生遊超山八首

張琪

秋日謁潔惠侯介之推廟

康乃心

五言排律

贈李別駕善政十八韻

董天榮

七言律

碧鮮堂

趙大端

壽聖院古柏詩

普信

鳳凰臺

鞏思問

尹吉甫將臺

任良弼

將臺

梁 楨

清虛觀玉皇閣

姚 燧

玉皇閣

梁殿邦

贈別駕李公和庵先生

劉 玉

輓郝節婦

石美玉

麓臺山二首

張天斗

再住超山

際 得

登尹吉甫將臺

康乃心

吉甫將臺次太乙先生韻

王 綬

尹吉甫墓次前韻

陸豹雯

登吉甫將臺次前韻

陸宣元

超山

陸豹雯

謁梁萬戶墓呈康大太乙

劉 嶠

劉思齋遊麓臺山以記見示

王 綬

清虛觀古柏

雷九章

十二景詩

麓臺登翠

王 綬

超峰曉月

王 綬

源池泉湧

王綬

嬰溪晚照

王綬

賀蘭仙橋

王綬

市樓金井

王綬

鳳鳥棲臺

王綬

于仙藥跡

王綬

清虛仙跡

陸豹雯

書院絃歌

陸豹雯

河橋野望

陸豹雯

仙觀古柏

陸豹雯

西河書院卽事

王綬

七言絕句

雷英章

贈益公和尚還超山

王廷筠

讀壁閒端溪詩有懷

韓邦奇

赴大同得樊恕夫書

韓邦奇

平遙有感

蘇志皋

憩清修寺詠松

宋岳

次寒村韻

無名

平遙縣志 卷之十一
重過凝碧樓

范道行

喜雨

陳以恂

介之推廟

陳以恂

署樓曉望

張大成

超山卽事

明瑞

五里莊壁上重書義棠橋詩

愛玉

送劉思齋先生遊東山詩

雷漢章

登麓臺山

劉頤

麓臺山歸

劉頤

清虛觀仙跡斷句七首

康乃心

弔晉太子耶律妃墓四絕

康乃心

詩餘目錄

次從簡韻

董紹祖

寒夜憫戍

董紹祖

題超山百福禪院

王綬

春暮同劉思齋宿超山僧舍

陸豹雯

詩補遺目錄

迎鑾詩九首

沈甯

平遙縣志 卷之二十一
大駕西巡恭紀二十四韻

王綬

柏山觀古柏歌

沈甯

西河書院感興

沈甯

柏仙觀古柏歌

黃大蘇

西河書院感興

黃大蘇

送張邵之平遙

朱彝尊

詩續編目錄

堯廟

雷仁育

庚辰春仲旋凱過棲真庵贈楚珍仙師特通額

九日過棲真庵四首

李由中

清虛閣

雷仁育

紫蓋峰

劉釗

萬松嶺

劉釗

文殊頂

劉釗

清光峰

劉釗

觀音坪

劉釗

寶塔巖

劉釗

應潤泉

劉釗

百福井

劉釗

夏過棲真庵次陸韻

郝庚

鳳凰臺

雷河清

修建龍神祠落成敬題

德貴

雲社

郭興讓

書院絃歌

冀步雲

中秋遊超山聯句

帝堯廟

劉興樸

鳳凰臺歌

雷仁育

書院聽絃歌志喜

德貴

將臺懷古

朱宗元

再過棲真庵

郝庚

西河書院四時勉學詠

薛登五

弔晉太子耶律妃墓

朱穎

郝烈女

劉釗

超山秋夜

毋爾信

烈女郝氏輓歌

冀陳器

平遙九日

折遇蘭

三畛鳴鳳書院七絕四首

折遇蘭

門人喬明經邀遊冀氏小園

徐繼畬

藝文

平遙縣志

卷之十一

藝文補遺

汾州平遙縣

平遙縣志

平遙縣志卷之十一下

藝文補遺

汾州平遙縣葬枯骨碣銘

并序

金李致堯



蓋聞衛國風之詩曰凡民有喪匍匐救之周小弁之雅曰行有死人尚或瑾之是知死葬之禮古今所重也然生死異路而苦死者其理堪哀非生者孰為埋瘞壽夭殊途而橫天者其情可憫非壽者孰為薦享噫枯骨者實橫天而苦死者也互古以來閒或有之或遭饑饉之難或值刀兵之劫或溺大水或焚烈火賢愚罔間貴賤無分若崑崗火

炎玉石俱焚致使屍橫於地穢達於天無人收葬深可悲
耶恭觀 開星君之請命求 太上而說經下傳於人世
郭羽客之興嗟感 天師而著頌俯示於塵寰 天真降
鑒尙憫遺骸特化衆生成行是善矧爲人者宜如何哉且
免悲狐死謂傷類也况至靈於禽獸者乎巷埋里葬乃常
禮也况其間有親知者乎昔穎川黃霸造棺而瘞窮氓校
尉曹褒買地而葬無主陳寵賢守也口行葬諸縣之骸骨
致哭聲而盡絕孔車長者也冒法葬無親之誅者遂聞上
而嘉稱古人若是德被羣靈名垂後世顧不偉歟本縣頃

自丙午歲季秋二十一日大軍破城時有援兵五千人遺
民數百戶內外生靈約計千萬或長驅不返或迎敵而殂
威臨而墜井墜河者有之勢脇而自刎自縊者有之士民
共戮善惡同誅有千里而離鄉者有一門而盡歿者屍盈
郊邑血滿道途觸瀆天地暴露星霜日往月來股分肉盡
親知莫辨男女無分白骨交橫孰可忍耶於是時也僕雖
脣齒傷刃幸老幼全生二親遊宦千里歸鄉仰承天地之
洪恩深懷螻蟻之謝意至甲寅歲敬從父命與衆道友特
推悲懇各出己囊師周文之仁法口聖之善勉倣古風哀

平遙縣志 卷之十一
矜枯骨命工僱力遠收近拾數月之間聚一千五百餘副
置於觀之東廡隨緣化衆於中秋上澣日廣命道流建黃
錄大醮追薦一切亡魂三晝夜至十三日卜葬於城西北
五里古大墓之北春秋祭享以時不闕嗚呼風吹雨灑淺
土尙多未經葬者依青暴白耳聞目見泉口口口僕等於
丁巳歲再發哀衷不恪所蓄僱工化力徧向郊原廣收遠
掇半載之間又得二千餘骸萃於前廡化緣衆善於中秋
二十四日特口前口設黃錄醮事拔度亡靈至二十七日
厚備行儀葬於叢塚之西歲時祭焉至辛酉歲口初因米

友井中淘出屍骸五十餘副衆力口口於城南趙選地浮
土耕出軍屍七百餘副及裏外井中水浸者命土人淘出
二百餘副諸處尋收又得一百餘副並僱力拾盡收於觀
廡隨緣簿化於上秋二十二日依前厚儀設黃錄追薦醮
事至二十五日葬於前墳之南時並祭焉凡此三禮盡出
羣誠祈彼亡靈咸蒙薦力由是縣宰王公特施經幢安置
叢塚又使孤魂悉霑勝利謹書於石庶永其傳而作銘曰
哀哉亡靈 生逢運劫 不意天心 深懷忠節 師震

雷霆 氣橫霜雪 城破家殘 父離子別 避刃者殂

迎敵者折 河井漂流 刳縊交列 驚戶幾歸 敗軍
殄滅 千里而來 一門盡絕 不分士民 莫問愚哲
徧地橫屍 滿城流血 郝勇戰亡 彭機計竭 渾歿
堯臣 空悲孝烈 嗟爾英雄 嗚呼天折 我輩推誠
哀收痛掇 廣萃羣骸 連開數穴 葬禮三修 醮筵
屢設 春秋以時 祭享不輟 日落風悲 雲愁霧結
鬼泣神號 猿嘯鳥噎 寂寂悲墳 煙鎖明月
皇統壬戌歲上元日立石鄉貢進士李致堯撰并書第一
次醮首前麟州新泰縣令李洵仁閻獻羅亮王德成深李

深史協鄧立郝溫知觀張得申副觀白得時尙座孟得河
施墳地田贊第二次醮首李洵仁梁琮閻獻羅亮王德成
深李深史協武純王佐陳彥郝明趙璧武皋孫永郭振寇
彥邢進龐序劉真范喜李遠常隆王厚王禹陳德米友張
道豐郭儀康元秦泰胡恭呂溫張宏張師岐韓奕畢安武
玉郭憚耿光閻忠張道侯章寇贊郭郁張祐張禮郭信王
琦郝溫王喜知觀白得時副觀宋得高第三次醮首耿光
李洵仁米友 收拾枯骨梁琮閻獻王德成深史協知觀
趙得柔副觀劉道冲陰陽閻彥冲郭儀封

超山神祝文

宋周煒

維宣和元年歲次己亥十二月癸酉朔初十日壬午中奉
大夫知汾州軍州管勾神霄玉清萬壽宮管勾學事兼管
內勸農使兼點檢牧馬事借紫金魚袋周煒謹以清酌庶
羞之奠敢昭告于應潤之神惟神惠澤一方民蒙其福所
聞于朝以彰休德錫以應潤顯揚厥功煒職守茲土獲庇
良厚謹遣宣教郎知平遙縣事余彥和涓辰致禮明告于
神伏惟降監尚饗

創建棲真庵碑記

朱之俊

有明之末盜氛孔熾楚均州房竹圃據為巢穴連年累歲
騷擾靡甯海內朝山者裹足良趾概不敢進而武當黃冠
大半散逸糊口於四方矣蠟燭澗何子一貫緣在汾陽來
建立帝宮殿於石盤山遇仙坪張子守性緣在平遙來建
立帝宮殿於十里鋪何子登橐方興不誠於眾為僉憲榮
公所逐狼狽南遁廉張子道行高移牒趣詣西頂以主其
事再辭不允至則籌畫指揮昏旭罔怠工甫及半積勞殞
生其徒郭子太明繼之垂成不祿徒孫寶子清白又繼之
平邑大工則有朱守丹李子誠蓮暨徒蘇子宣福楊子太

賓在協力共圖不日告竣兩地同時舉事同時落成在汾者余已敘其巔末久諸石矣在平者礱礪以待幾欲屬稿爲允所敕朱子踵門求之至再至三會余入春善病近方霍然日苦應酬向晦漏下數十刻始篝燈潑墨以應其請按 立帝降生淨樂國之日乃神農氏之末年長而慕道入山苦修感無極紫元君授以法要經四十二年而道果圓成天詔下放位隆北極世儒稽古未詳猥以淨樂爲外國遂有太子越海東游之語不知淨樂卽春秋所稱有麋之國如黃帝生於有熊之國之類是也今均州南有樂都

村又東有淨樂王塋塚據古史仙傳淨樂國卽均州無可疑者武當記曰 立帝刻刻不離大頂無時不在南巖今汾平兩邑香火甚盛凡有祈禱靈應如響安知 立帝雲車颺駟不甞離七十二峰而北遊汾水之陽乎余往歲臬狼之役取道平邑假憩道院則見環以土堡冠以雉堞獨蹲曠野客至如歸不覺生歡喜心細詢廟祝最先立玉虛大殿以奉金容次建玉皇閣東華堂前門中殿靈官黑虎二殿以及十方齋堂復券窰洞數十餘爲靜室起于丁亥終于乙巳日月一十九稔厥工始畢此一役也張子首開

其端朱子卒竟其緒內立藥局修合奇方丸散兼施活人無數則李子主之外構茶寮椒漿並設夏無喝喝冬辟寒威則蘇子主之而且高懸鐘板接引行脚茶舍之傍卓關帝祠並左右小廈若干如張兩翼爲旅人息肩所商販往來絡繹不絕一一手額而去在昔聖賢自度度人自利利他不過爾爾三子方之可以無媿然庵名棲真者何余聞道家有全真正一二門亦猶釋氏之有頓漸分南北宗也然全真之教昉於東華教主少陽君興於王重陽盛於邱長春攷重陽子崛起一時繼三祖於既往啟七真於將來

可謂鼎鼎奇男子區區天蜚雲舉踞席南宮烏足以酌其功德哉嘗釋夫真之旨而推廣之三光恆明四序不忒天之真也春生夏長岳峙川流地之真也他若青林紫字不假煤楮一炷結成號曰真經黃芽白雪犬食化龍鷄吞變鳳號曰真丹鞭風策電入水不濡投火不焦號曰真人真之時義大矣哉今朱子提挈綱領戒律精嚴虔禮皇壇祝釐諷誦而未已也復招集羽屬安鉢檢藏符禁鍊魔燃九幽之燈建三天之醮凡道門事務無不爲之以真題庵意或在是歟異日上蒼鑒觀高人輩出有若重陽祖師之分

平遙縣志 卷之二
梨十化大振山門亦未可知卽指此地爲秦川之劉蔣燕
觀之白雲誰日不宜余僭濡筆而志其略至慨作慕引之
賢紳首倡檀施之信士悉附碑陰以傳不朽云奉直大夫
內翰林秘書院侍讀纂修明史副總裁予致郡人朱之俊
薰沐謹撰汾陽邑庠廩生相里東藩薰沐謹書

建修養濟院碑記

梁 潢

天心仁愛帝德誕敷大地之中貧富雖殊疇非天地之子
凡宇內之疲癯殘疾憊獨鰥寡皆吾一體之顛連而無告
者也顧煢煢之民人雖忽之天地之心未嘗不憫之也苟

能惠恤困窮是爲合天地之心合天地之心則必獲天地
之佑真西山先生曰人能以惠恤爲念者其子孫必賢其
門戶必興灼哉斯言詩云哀此煢獨書曰不虐鰥寡周禮
遺人阨門關之委積以養孤老古聖帝哲王未有不以矜
孤恤寡爲急務漢立安養所宋設養濟院明初置孤老院
後改養濟院

國朝因之予遙縣治西北距城數武養濟院在焉榭屋十
餘閒悉塗塗附風雨不仁急潰急溟孤髦輩日枵腹夜露
居每值三冬啼飢號寒之聲慘不忍聞邑侯陳公下車之

初庶務旁午遂愀然曰爲民父母睹此嗷嗷者能無省憂乎卽月給口糧申請報可復捐俸略地率寮屬倡搢紳以及博士弟子員各竭緡從事庀工鳩材數月而成向之啼飢者今咸鼓腹矣向之號寒者今得棲所矣風風雨雨歌思之不置者孰非我公之明德哉董厥事者二尹柏君君佐捕廳王君家瑾驛宰李君時洪東西各十楹必先亭一楹寶公亭一楹門樓一座工旣竣不可無以傳之於後也乃鐫諸貞珉夫以公天地之心行仁者之事豈其沾沾一日之名者然而賢有司之盛事不可無以傳之於後也予

爲之志其巔末俾後之人覽是石者皆欣然有餘羨曰此某邑侯某僚佐某紳士之所惠人於當日而不泯於將來者也則什百年後或遇陰雨之傾圮又必有興感而繕葺者嗚呼是可以風矣是可以傳矣公諱以恂字式阿廣陵辛丑進士也康熙十二年秋九月吉旦

重修上巔山路碑記

黃汝鈺

自中州踰太行之北北之代東之燕西之秦綰轂四衝惟陶爲最自太行之險而外迴岡絕壑磴道連互其南入中州之路羊腸詰曲鳥道嵌空尤稱險塞者則惟邑之邢村

之通集元 卷之十一
抵南關六十里爲最徑斯道者銜勒一不謹則輶摧軸折
人畜顛隕冰崖雪嶠寸步皆躓皇華之使迴車他出行旅
愁煩視若二褒斜焉有僧寂果惻焉憫之矢願募役以平
此路里之耆民劉澤民等樂然響應自康熙二十五年正
月迄今錙積僉歛以食役者使窪者平嶄者坦狹者廣向
之羊腸鳥道一旦化爲雲達商輶載歌輶軒叱馭澤民之
力爲多焉謁余請記余惟道弗不治昔人以之覘國况陳
掾之會顛越是虞乎惟高下陵谷天地不平而以人力補
裁之若痿之得掖盲之得相厥功之懋亦參平成之百一

豈特分有司之責哉爰勒其蹟於石俾來者嗣而葺之則
僧與澤民之功庶幾其不朽也昔康熙二十六年 月

日立

禱雨告城隍文

陳以恂

惟

上帝命神與 朝廷命官雖司有陰陽而分無彼此總期
興利除害以共治此土也若不能承天惠民則官之罪至
其圉災捍患則 神亦與有職焉 以恂 承乏茲土已及半
載雖發政施令無一可觀而經經拙守可矢天日謂宜雨

賜時若物阜民康以與百姓相安於無事不意去歲自秋
 徂冬自冬及春雨雪愆期亢賜日甚二麥失土膏之和三
 農切雲霓之望豈以恂身負過愆歟民罔教化歟下多暴
 而上多欲歟清夜自思無一於此抑有難興之利難除之
 害歟噫嘻君家婦難為也以恂嘗謂為此地之民苦為此
 地之官尤苦然則為此地之神何忍聽官民之困苦有
 若此也今以恂齋戒告虔惟冀神明垂照伏願尊神
 憫此遙民速布密雲立施甘雨俾夏麥廣收秋禾早種庶
 幾神受黍稷之馨而以恂亦無忝司牧之任卽遙邑之

父老子弟將歲歲沐護庇之福於無窮矣特此敬禱惟
 神鑒之謹告康熙十二年孟夏吉日

兩賢侯祠記

康乃心

賢侯祠何祀賢侯也何以祀以其賢也其為賢奈何功在
 聖賢也其在聖賢奈何往者陶有夫子廟在縣之南有佛
 寺在縣之東崇禎時有王令曰凝命者舉而易之以廟為
 寺以寺為廟以廟為寺以寺為廟是以佛而僭聖位也或
 以侮聖或以佞佛其易之之故不可得聞矣而聖域居然
 而佛國矣士憾之弗能爭也數十年而魏侯喬懋來觀其

制聞其說愕然拂然曰是烏乎可士爭之令然之請於上僧復爭之幾不能得侯曰是烏乎可力持之遂得報可廟還吾夫子寺仍還彼如來士感之如青天白日之在望也然而紛更之始殿閣弗葺廡廊未飾風雨剝蝕春秋之祀荒蕪而已士憾之弗能新也閱二十年而今王公綬至朔望展謁春秋承祭覩其狀曰胡寥落其若是也是烏乎可是烏乎可遂毅然斷然謀所以新之者新聖人殿新賢人廡新啓聖新明倫新名宦新鄉賢新齋房不勞民不瀆里出其俸金以倡之蓋無弗新也已而顧瞻前後復蹙然曰

聖人之門遊者衆矣前路逼無餘地而氣象則有似乎鬱塞抑滯也者雲路天衢士之養於庠序者以時奮飛途不開則氣不舒也於是又於櫺星門外起臺建坊南鑿泮池爲橋其上直抵南城上加登天然廣矣大矣宏矣敞矣居數年又念文昌舊制在學宮祀於北城何義也復捐俸如初卽於雲路之東大起層臺建崇閣凡高五丈許祀文昌其上奎列其北以顧廟學其閣高出城外視之如天半朱霞雲中白練其爲五道之星岳吾徒之瞻仰也廣矣大矣宏矣備矣壯矣麗矣陶之都人士春夏詩書秋冬禮樂絃

平遙縣志 卷之十一
誦其中者豹變龍蒸可拭目而俟也不有魏侯孰開其始
不有王侯孰繼其終故曰功在聖賢也功在聖賢故賢之
賢之故祀者祀之祝者祝之也於戲是可以百世矣魏侯
者家柏鄉王侯者家蘭州皆名孝廉魏丁酉王甲子也

重修洪福寺記

薛所蘊

禪師龍庵諱昇河南懷慶府孟縣人余同鄉知其始末甚
悉禪師張氏父四江母閻氏方在襁褓中卽與羣兒不類
稍長從事浮屠塵心泊如了無罣礙識者知其夙有根行
每與人曰吾輩既已出世甯止祝髮披緇僅作比丘像也

呂故受具伏牛嗣法少林遍歷燕晉之墟凡講堂法席無
不虛心叩聆閱數年歸釋典奧旨洞徹意地日與薦紳先
生學士名流指畫最上法門吾爲青衿時亦嘗偷浮生半
日之閑邑中無大禪林各家自創小庵爭延供養吾於庚
辰秋奉

命之西涼過梓里相會於北郭白衣庵見其齒高而顏若
童氣靜而神彌炯因謂之曰禪師當奉西來之微旨普震
旦之宗風開示羣迷共登彼岸鬱鬱居此其能廣傳衣鉢
乎師曰此吾未完事也今老矣昔曾客晉中汾州府平遙

縣洪福寺寺不知建自何時年久頽壞本鎮鄉耆王集等相邀於史村淨土庵以主其事自萬曆四十五年至後閱歲月而報竣整肅其牆垣巍峩其殿宇輝煌其佛像幽潔其寮舍且奉都中所造滲金佛像壹尊於經堂中焚修不替爾時所處者重新之規模所與者向善之人心尚不能以一得之愚強作津筏今何時也復念及此當年一場盛事未及銘勒老僧固不足論而諸檀越鼓舞樂從之意竟湮沒不傳亦可惜已敢乞一言用垂不朽則法施財施其功均未可量余笑而應之曰是卽所以爲記往而志之可

也又惡乎贅

遍融和尚塔銘

并序

康乃心

師諱實週號遍融太原甯武關人也俗姓張氏幼而通慧不喜煩囂順治初干戈甫定秦晉之間復有倡亂者郡國雲擾師遂棄家遠遁走燕京出山海關如白雲山禮相生和尚披剃爲弟子後復至都門受戒廣濟寺玉光和尚座下日夕參究求出世法念大事未明石火風燈泡影夢幻非廣爲印証不可遂一衲一鉢扁舟東下歷吳越名邦所至古刹叢林謁諸尊宿說經演偈頓悟夙因數歲方歸歸

而奉師相和尚住超山下之昭慶禪院者二十年戒行精
 明道俗景從後又印証於風穴之雲峩和尚旋居晉紅土
 溝日閉門靜坐檢閱龍藏凡五年門人純如主持超山請
 師歸方丈師飛錫岩阿為歸休計生平解悟天成禪悅灑
 暢流水行雲無人我相雅好觀書手不釋卷宗鋒教典語
 錄詩歌靡不研究乙酉嘉平廿八日無病而寂春秋七十
 有六僕歸自金臺訪勝此山純上人以師塔碣為請遂次
 敘而銘焉銘曰 翳佛子 曰週公 躡白雲 續禪風
 山與海 東復東 參廣濟 得圓通 之吳越 山

水中 妙蓮華 白社同 閱三藏 禮大雄 返名岳

對青崧 松寂寂 雨濛濛 師在此 壽無窮

康熙丙戌歲立夏吉旦關中邵陽康乃心撰朝邑劉嘏書

創古陶中都河橋廟祠糾首姓名記 梁棟韓邑拔貢

凡首大事垂善名將有異人負一邑望者為之先焉續大
 事紹善名更將有異人兼一邑望者為之後焉莫為之前
 其善不興莫為之後其善不永語云相與有成良有以也
 平陶中都河建木橋處屬京師孔道往來雲集向因無橋
 利涉維艱邑善信劉澤民薛進忠閻賀泰劉孚邦安爾邦

劉澤長等慨然倡首募諸檀越肇建石橋於康熙十年三
月朔旦澤民生子因以橋名後劉演和郭清甯繼事募緣
三百六十有奇萃澤民議諸鄉恭請冲麓侯道人主其事
道人黃冠素服勤勤懇懇復募緣得七百餘金橋之成也
創修 三清殿 關聖殿 河神殿各三楹東西廊房各
五楹茶寮庫廚各一所 準提殿三楹澤民獨成之是役
也工程浩大李何言鐫碑陰以垂不朽云康熙廿五年撰

藝文續編

重修櫺星門記

聖廟櫺星門歷年既久勢將傾圮邑侯張公廷琪政旣宜
民心尤尊 聖捐俸廿金重爲修葺於此屹立永固煥然
聿新邑紳士不忍久而無傳爰勒石於壁以爲後之捐修
學宮者勸謹誌

改升太學碑記

李瑛臨 歲貢

邑侯李公諱國柱於雍正六年奉 命簡涖茲土覽山川
風物熙熙穰穰興富教之思及駐仙臯閱邑乘見地丁錢
糧汾郡八邑中實爲巨擘而入泮名數舊額僅同中學遂
勃然動改學之志謁廟講學卽向賈張二學師並闔學生

員言及改學之事云見義不爲無勇也公惟見義勇爲初未待他人懇祈引端直以此爲涖政先務遂令闔邑具呈公憑轉詳彭學憲諾撫憲會本疏題請

旨允改上學夫陶邑之宜爲上學久矣前康熙四十年閒亦曾公具呈請改乃中多阻隔事未具題遂寢今李侯一舉成功萬年桃李盡是公栽植矣其他興利革弊不讓龔黃卓魯無暇徧舉而此菁莪棫樸之澤雲漢作人之化將繇繇於奕世而安可不爲之記時雍正十三年歲在乙巳榴月吉日

重修賀蘭仙橋碑記

郭名京 邑諭

平邑八景賀蘭橋其一焉嘗考邑志以爲賀蘭仙子經過此地因以爲名是仙以橋留橋因仙著耳想當年長虹高卧碧水深沈綠蘋鋪池茂樹掩映東接麓臺之翠西引市樓之簷固勝景也無如世代久遠愚民無知屢傾灰渣行潦塞溢頻年爲患居民苦之乾隆元年豸公先生集父老各出己資浚其池復券輒橋而南北之路通居民之害息因栽以槐柳密布陰濃而金魚玉鴨遊戲浮萍之間每大雨後潦水入池音如巨雷居民老幼胥觀濤聲焉而古跡

於是一新矣及今二十年餘橋復傾頽池亦平蕪衍薪瑞
九復謀於父老曰橋今不洵前人之功盡棄居民之患復
生而仙跡亦因之漸湮咸願傾囊重振舊跡於今歲二月
興工四月告竣而求記於余余見水患息而仙跡存因敘
其始末以傳於後云是爲記

補修石橋碑記

郝 康舉人
康侯

惠濟橋邑勝境也余少時遊其地見焚修於中者饒有仙
風古骨一少年道士更矯矯如雲中之鶴因心異而識之
歲戊寅余設館於此風景猶昔而少年道士已卓然樹檣

越之職然觀其容止益循循自飭不以賢智自恃嘗言曰
余建橋祖師經營數十年闢茲勝地逮余師祖與師叔本
怡等同心協力改建山門又於兩側門外創修鐘鼓二樓
橋之南募修甃堰六十餘丈廟之週圍甃砌西南二面務
使修真靜地不減園苑仙風余才既不逮時又艱難豈第
重大者弗能舉即橋之兩端年深石泐常爲往來車馬患
有志修補而苦於弗勝將若之何余曰此萬衆公願也吾
師其倡之因遣師弟曹仁通西至陝北至京以及本邑鄉
村鎮落共募四五百金糾工伐石補廢起衰不數月間向

之崎嶇難行者遂成康莊夷路矣又以其餘貲建茶亭三楹既濟行人之渴且爲官民迎送之所遙而望焉東與道院相映南與長橋相連水樹蒼茫疑入畫圖中令人逸興飄然是非所謂善紹前烈克廣德心者與然師不自有其功乃將出貲姓名勒石以垂將來而乞記於余余竊見世之黃冠羽流每假募緣以營醉飽否則稍有建修輒張皇誇耀於人而師獨歆然不自居功也因卽其所言略綴數語以表之庶後之任持此地者咸體師之心爲心以相維於無窮師爲誰趙姓諱仁瑄字石亭真人李正誠之徒孫

本悅之徒也

重建龍王廟記

德 貴 邑令培公

平邑龍王廟始建於城東郭外基址逼近中都河春夏山水暴漲衝決震盪漸就傾頽居民暫爲修補計踰年水濼土解前功盡沒棟宇亦岌岌乎將墜也余歲時瞻拜見而心銜者久之乃屬里社農民擇地而圖遷焉僉曰八蜡祠北有空基基廣不及一畝以建祠宇綽有餘裕余思龍王與八蜡之神均有功於農事徙其地而合祀之誰曰不宜於是諏日興工命取舊木之未壞者因而用之新木之宜

增者酌而購之人心協而工役勤未幾正殿三楹告成崇祀龍王於中風伯雨師左右配享以坐東三楹爲後院前殿祀八蜡神如故殿旁左右透迤迴轉兩院相通合前院東西廊及牌坊與獻劇樂臺兩傍門徑俱施采繪而整新之自是金碧照耀棟輝煌望之鳥革翬飛極霞蔚雲蒸參差霏結之致矣因於前殿題額曰補天地憾後殿題額曰霖雨蒼生嗣是月會朔望瞻拜有所春祈秋報牲帛是將庶平時和年豐百穀順成之休明神其默佑之與是役也始於乾隆己丑之仲春落成於是歲孟冬之月余期斯

事之有補於吾民而久而勿懈也因援筆而爲之記

重修金井樓記

趙謙德 太原舉人

樓之肇興舊碑所闕第傳東南脚有井水色如金故名先是康熙二十七年邑宰黃公葺之井湮沒故地不可復得掘泉以當其事數十年來樓且浸頽壞因歎古陶勝蹟半就荒涼但餘麓臺紫蓋諸山終古環秀不改他若鳳凰臺爲荒墟清虛觀松柏自火劫後亦寥然僅存者時事之興廢類不可常況斯金井之名實難稽若有而若無者與朱欄碧牖旋化而爲蔓草寒煙遐覽者所以感昔人之經營

爲不可再也丙子冬覃懷李公來宰斯邑嘆是樓之將傾
以土瘠民貧訟獄盈繁方爲民謀富教而無暇及此越明
年政通人和方欲補城關之瑕塞汾流之患邑人乃以斯
樓之役請公遂施俸金擇邑之老成者共成焉是役也六
閱月而告竣費四百餘兩工僅二千餘爲制南向舊塑
關聖大帝像粧而新之北向增塑 觀音大士像最上一
層則 奎光閣爲人文觀興之所由起遡斯樓自黃公振
葺後迄今凡七十餘年復煥乎一新以是嘆其興其廢人
力爲之予故不獨爲斯樓幸也異日者公聽政之暇憑欄

縱目擊山秀於東南挹清流於西北仰觀煙雲之變幻俯
臨城市之繁華悟天道之盈虛察人事之推謝有不穆然
而思悄然而歎者哉不特此也聞遙山之牧笛則思牛羊
之何以康見遠浦之漁舟則思狂瀾之何以戢下視煙火
萬家紛紜市集則益思所以保聚之方永懷吉甫之武功
遐想卜商之文章俯仰周章絃歌入耳則又深觸其學道
愛人之素悃有勃然而興悠然以遠者斯則誠爲斯樓之
大幸矣於戲傾否保泰終則有始天之道也廢者修缺者
補賢有司事也獨斯樓也哉

遊超山記

郭興讓 禮賓

超山於吾邑最稱名勝乙亥秋侍家君杖履往遊焉自城南車行三十里皆平田廣疇無可登眺近東泉隱隱望之煙樹蒼茫中遠峰時露始令人有谿山之想逾五里至郭谷灘灘際兩崖間亂石縱橫如卵如棋最奇者如舞人如奇鬼卧獸不可名狀水從石間流出潺潺有聲灘行數十武緣磴東上有徑鑿山腰閒廣可並騎遇險陝處須側肩行左顧石壁百仞立巔有林木望之若小草狀右臨深澗水溶溶不可逼眎偶一搖目意慄然輒欲墮下盤折紆迴

十餘里始復下灘中境稍平曠神色徐定迴眎逕上行者如置身峩眉天半自是折而東磴益高澗益深崎嶇不減前逕而懸崖怪樹怡人心目登陟之艱始若忘之東行半里許崖壁如削多宋元人刻章漫漶不可讀余方擎拳其下而山僧已軋然啓扉肅客矣揖同儕扶老人拾級上憩百福禪院東偏有閣曰飛雲清光左峙紫蓋遙臨疊嶂層巒皆几席閒物南瞰松嶺蒼翠接天此身殆欲飛去因亟呼山僧前導觀龍泉泉即前灘潺潺作聲者也水流齧石成澗廣不可踰通之以梁踰梁而上抵萬松嶺濤聲謾謾

若與水聲上下相應和然立其巔遙望遠峰湧螺獻翠昌黎所云天宇浮修眉者彷彿遇之寺僧遙指東嶺招提境更幽邃俗所謂後寺者是也余欣然神往方欲偕同儕鼓力而前於時日西沈風颼颼響林木間遙見老人從閣上舉袂招之乃相率尋故道下還寺中已深黑不見人矣越宿而去時同遊者余友梁修六郝康侯及門人安東之郝大臨田大全也

再遊超山記

境數見而不鮮情既竭則無餘靈巖洞庭之奇聞聲者不

遠千里至而澤畔居人未嘗過而問焉境非有時異情蓋難強同也往余遊超山未盡其勝幽巖絕壑夢想閒若或遇之此心缺然終以不獲登峰爲恨辛巳長夏門下士胡程萬李素書王禹華皆有登覽之興邀余偕往余挾此懷久矣幸得同人寄趣煙霞相與行歌互答於空山寂歷中則東南百里外重巖複澗可以尋踪而至而數年來未愜之願獲償於是選屐齒具糗糧鼓勇而前林泉邱壑之奧向時沈埋於濃霧蒼煙搜剔所不到者益復低徊流連覺蒼茫故跡中別有新趣怡人余方欲踰壁凌崖一極幽況

而陰風颯颯林籟飛空寺僧色大駭乃相戒屏息復趨而
還前此遙指東嶺仍望之而不可即也嗟夫余鍾情於是
山深矣顧身勤事左再造焉而未窮其奧豈仙窟靈區專
以供奇人偉士之棲宿獨秘惜於余而未許問津耶雖然
使余一覽已盡是山之奧則情已無餘誰復向濃霧蒼煙
中孳孳故跡今雖來而別有獲也而重巖複澗留以相待
者正復無窮則余繼此之遊方未艾也因書以示胡李諸
生

夢遊超山記

自亥秋有超山之遊而清光紫蓋遂成膏肓閒物暇日兀
坐書窗遠眺層峰怡然神往偶假寐已栩栩置身縹緲峰
頭矣向時危崖絕磴攀枝歷石不能到者殆如憑虛御風
飛行絕迹而至至則偕三三友人浮白盡醉相與枕藉林
薄閒俄焉谿雲擁樹山雨欲來小奚驚顧起立忽見松梢
微動風捲雲收日色穿林乍隱乍現下眎澗中桃花爛熳
如錦簇簇與山半飛霞遙相映射蓋宛然遲日和風景色
已而山紫煙凝桃實離離下垂芬芳襲人披襟當之又已
清風徐來矣倏忽間晴陰異態溫涼殊景幻化無端於時

四顧茫然林泉谿壑迥非昔況意已適東嶺寺僧遙指處
矣因狂喜賦詩方濡墨拈毫忽聞簷雀嘈嘈此身仍兀坐
書窗下也迴想夢境慨然歎人世富貴功名轉移於瞬息
者何減暮雨朝煙貪者冒險而求雖落身萬丈洪崖不恤
安得好鳥一聲喚醒人間春夢也詩已不復記彷彿得末
二聯云前度遊成幻今宵夢轉真青山誰是主閱盡古今
人嗟夫古今人以遊名者何限以爲真耶則逸少之蘭亭
安石之東山文饒之平泉俛仰已爲陳迹以爲幻耶則子
虛烏有一花一鳥皆足令百世下流連不置且焦山之名

以焦葛溪之名以葛山澤無聞且乞靈於騷人韻士矣谷
之名郭惡知非與余有夙緣與

重修超山應潤侯祠記

郭興讓

平邑東南縣亘百餘里億碧萬青兒孫羅列獨超山巋然
屹立跨越諸峰之表城家記所謂過山者也泉出山半飛
鳴而下吐霧蒸雲疑有神物變現出沒其際土人禱雨靈
應宋宣和初縣宰余公狀聞 勅賜封號曰應潤祠而祀
之迄六百年不廢祠旁百福禪院晨夕香火寺僧兼司其
事

國初大機和尚自江南駐錫於斯誅茅伐石式闢前規嶺
雲爲幄山翠爲屏斷崖荒谷中別現世界嗣是名僧輩出
相生以戒勝松野以詩名而手口拈据勤事綢繆者純如
和尚爲尤著邇來綱頽紐絕苾芻非人神祠宇像忍坐視
穿漏林麓之利徒飽私囊空門幾成利藪矣邑侯李公廉
其奸狀現宰官身說法驅之出院復商之紳士自都門迎
佛僧上人使主院事上人純公法孫也杖錫都門三十年
矣始返故廬日擊頽壞卽矢願興修念 應潤神出雲降
兩澤被一方寺宇尤宜嚴潔乃首事繕葺庀材鳩工不辭

勞瘁落成之日邑紳士謀垂久遠屬記於予予謂宇宙名
區因人而顯廬山東林寺慧遠主之集陶元亮陸修靜諸
人而虎溪之跡以著法華寺西亭地僅方丈者二自覺照
屬子厚爲記而陂池芙蕖之美異世如遇歐陽子謂地以
人傳不其然與祠在超山自宣和迄今不知幾廢興矣獨
遺山片石輝映青峰碧沼聞傳徵君抱曠世才訪大機不
值造門而返遂使摩天巨刃無隻字留題空谷無人誰與
傳響者今佛公自度能爲慧遠否陶陸去人不遠必有向
煙水蒼茫中相視而笑者矣否則雄深雅健文如子厚者

當世未嘗無人公試造廬而請安在超峰千尺不與鵝山
桂水並傳也若夫龍聽講經吸墨成雨慧力神功相傳益
彰其為生民灑潤多矣遙紳士尤引領望之

重修文昌閣碑記

德貴培公

事神以心不以迹余嘗欽奉 帝君陰騭寶訓有人能如
我存心之句煌煌至教無非覺世精言及讀孝經暨化書
等篇蓋取心為化原孝為心本世第知奉 帝君以迹而
不知奉之以心何逐末而忘本也我

皇上龍飛二十八年夏余奉委署平邑敬誦 帝閣時金

容適為匪類所損一見悚惕弗安於心急思所以整新之
至冬署篆事竣奉文題署興邑將赴任向諸紳士商及修
閣事宜叮囑者久之暨三十二年夏復補授平邑蒞任趨
謁 帝閣畢見諸紳士方虔為修整漸次就緒私心竊幸
向來積忱於茲獲慰矣蓋是閣創建於蘭州王公面勢向
南議者疑所向之未當繼修於井研雷公改勢西向於方
位為較正公復詳撥下西門外下東門外各往北城壕地
北門外東西城壕地又教場地任莊村地各一段以上各
地歲收租銀以為獻劇香火之需祀事較前為加隆焉今

諸紳士復振興舊規新塑 帝君神像以肅仰瞻特起樂樓於坎位以昭侑享 帝位則坐震向兌奎星則坐兌向震雙閣璀璨以連雲羣樓環拱而映日肇始於癸未仲春落成於己丑孟秋洵郁郁炳炳文明盛軌也余復何言哉抑余聞事神之道求之於渺冥則虛求之於身心則實昔瓊山邱少保心奉 帝君寶訓於文鏡齋頭昕夕持誦廣爲刊布以垂世教闡試日見奎光執筆挾卷跳躍於前頓覺祥輝滿屋異香襲人遂爾揮毫如意擢選巍科即前賢之奇驗開後學之津梁而所以登賢書膺鸚薦以副

盛世旁求之典者端必有經緯原諸性術夫豈僅以浮華靡曼之辭爲揣摩捷徑哉諸紳士知斯意也亦可悟事神以心不以迹非迂談矣余復何言哉

宋孟曹玉山救水災文

郭興讓

汾水源出管涔南經太原合涂晉諸水而流益廣抵平介閒地勢平行水不受制每夏秋汎水怒漲則漂沒田廬淹斃人畜不可勝數蓋延袤百餘里閒瀕河邨落靡有甯宇丁亥七月霪潦連日夜汾水衝決沿河浸沒數十邨而平邑南官地邨爲害尤烈平地水深丈餘居人二百戶屋宇

盡圻婦女乘木板漂泊巨津中號呼望救人爭逃命雖兄弟妻子不相保余姻孟曹玉山昆仲新構大廈地高敞水不能浸急具木筏拯溺水者於家男女凡數百口有奇分處內外舍朝夕煮粥饋之歷五六日無難色邨人舉手加額相謂曰今日之患微宋氏兄弟活我吾其爲魚矣水退衆始稍稍引去蓋二百戶舉得無恙是舉孟曹倡之而經紀衆人之居處飲食使各得所者則玉山偕弟璉與姪大鵬之力居多云十月水涸邨人旋集故里將製屏酬德以誌不忘孟曹郤之再三卒不獲邨人於是走予乞言予考

古傳記所載救災恤患若潘好古葉封翁輩所活不過數人或數十人而子若孫登甲科履臺鼎其食報彰彰如是今孟曹昆季拯數百人於洪濤巨浪之中而衽席之飲食之其惠澤所及視古人何如其食報於將來甯可量耶雖然使孟曹昆弟預圖食報而始爲是舉則是有所爲而爲之此心已爲利欲所障徇利之人其肯捐目前顯據之利而圖渺茫不可知之報耶惟目擊漂泊之狀耳聞號呼之聲中心惻惻如疾痛在身欲須臾緩其拯救而不能自己而豈有所爲而爲之也哉孟曹昆季幸推廣此心遇災則

救見患則恤將德施無窮蒙休者不獨在一鄉矣予拭目
望之

冀張二氏救水災賢壽文

韓本晉 太原

宋元以前未有以文爲壽者有之自明始然能文之士必
審其人之果有可稱而後爲文以壽之而求文者亦必屬
之當代知名之士而不肯苟且從事故其事雖不远古而
其文尙有可觀浸淫至近代則委巷無足比數之人皆得
假諛辭以爲榮而邨師陋儒亦皆覲然秉筆不問爲何如
人一切以賢豪長者稱之甚或舉其人未嘗有之行而猥

以相奉夫稱人而奉之以所未有是何異向窶人而謂其
有千金之積也其文詞之鄙瑣無論已余宦浙有年友人
平邑朱恪三郵書於予爲其伯母暨堂嫂冀張兩孺人乞
予文爲壽予固非能文之士然嘗不欲輕有所稱述於人
讀恪三之書兩孺人固皆有可稱述者則何敢靳予言而
不爲之表彰也恪三之書曰吾邨當汾河之衝丁亥秋七
月汾水驟漲浸沒廬舍邨人數百家殆無完屋男女露立
洪流中哭聲震野吾伯母居址頗高憫邨人流離不忍獨
安急命子孟曹濟邨人之溺者於家親爲爨炊俾免饑餒

並爲析薪燎其衣服連晝夜不倦吾堂嫂曲體伯母意率
諸弟婦黽勉同心治饌以餉饑人不敢言勞微伯母拯救
之力吾邨數百家幾何不葬魚腹也今伯母與嫂咸春秋
登六旬矣邨人荷再生之德思爲文以壽而介從王乞先
生之言從王固知先生不輕以文壽人者然如吾伯母之
惠且賢或猶可當先生一言也余覽書畢歎羨者久之夫
捐貲以利物勤己而恤人得此於鬚眉猶難而兩孺人處
閨閫之中濟鄉鄰之溺此其溫惠慈良雖與古賢淑比烈
可也使今人而盡如斯余雖不輕壽人以文也且欣然而

載諸筆

重修文廟碑記

梁述孔 定襄

道統之傳託始於帝堯集成於 孔子故尙書獨載堯以
來而 孔子祖述之以爲萬世師後世之尊 孔子者必
遡帝堯而後世之遡帝堯者乃愈尊 孔子蓋淵源相接
有固然也平遙爲古陶地堯佐帝摯封植受封於此於萬
斯年之後其風淳其俗厚其人愛深而思遠輶採者以爲
有陶唐氏之風而其邑之學士大夫以迄商戶農氓亦莫
不樂遡前蹟自以爲古帝堯之遺民也則其尊 孔子而

崇祀之也宜較他郡邑爲尤殷矣按平遙縣 文廟創始在縣治東南志稱宏闊壯麗及前明崇禎九年徙治東太子寺改寺爲廟逮

國朝康熙十四年邑侯魏君裔慤始興復舊制嗣是葺故增新屢經修飭乾隆庚寅迄乙未邑侯蔡君亮茂更整新之而制始大備數十年來復有剝蝕傾圮之患邑之紳士庶念重修苦於創始之難而有司者或往往緩其事道光辛丑署邑侯靳君謁 廟周視慨然倡修捐俸三百金擇紳士之賢者俾董其事未基月靳君去復諄諄囑紳士以

斯舉之要毋中止董事者隨殷勤勸募邑之人若民踴躍捐輸集貲至萬七千餘金於是克日鳩工或仍舊質或庀新材樸斲焉丹雘焉黝堊而金碧焉自大成殿尊經閣東西廡暨諸祠門廳齋所堂廊亭池廚庫綽楔屏牆與外之文昌閣魁星閣以迄東西學宮罔不煥然聿新是役也歷靳君與邑侯楊君顏君署邑侯文君及今邑侯陳君倡始之功惟靳君爲最而規畫措置則陳君之力居多始辛丑暨甲辰費無慮七千金有奇而功乃竣計所集餘萬金入當行生息議立超山書院以爲經費噫一舉而兩善備矣

平遙縣志 卷之十一
夫 文廟之設爲學校之宗所以崇 先聖明人倫成就
賢碩培植俊乂而科名之振興固其所兼及者也平邑素
敦樸厚重廉恥去聖學固未遠而復能尊師重道以力復
古陶唐之風則淵源訢合而 先聖所陰騭而佑啓之者
其不在此帝堯之遺民哉況因是而有書院之設更足以
興文教於無窮哉 述 以在假設帳於邑之郊承當事之屬
爲質言以紀其事而貞之石俾後賢知斯舉爲急務而踵
而修者庶有以世濟其美也夫

重修城隍廟碑記

王佩鈺 蓮溪

嘗考城隍之祀始於六朝唐初祀者漸廣唐文粹李陽冰
有縉雲縣城隍記杜牧集有祭城隍祈雨文是唐中葉各
州郡有城處皆立廟也明洪武初始封縣城隍爲顯佑伯
三年改正祀典但稱本縣城隍之神今仍之然則邑之祀
城隍也其由來久矣平遙城內近東南隅有 城隍神廟
一區規模宏敞氣象尊嚴著百里之威靈誠一方之保障
也惟創修始於何時碑碣無存縣誌亦無可考查前明邑
令麻君修葺後我

朝康熙中邑令王君倡捐重修歲久坍塌金碧剝蝕乾隆

閒邑令吳君因前任蔡君倡捐重修未竟旋升任去復集邑紳之前膺斯任者諄諄獎勸遂集資以歲其事至今又將百年矣咸豐九年六月朔爲神廟會期夜聞不戒於火除寢殿未焚外自大門內至正殿暨兩廊前後神宇並廟之西院內真武樓財神殿悉爲灰燼誠異災也是月望後余適由陽城奉調涖平到任後敬謁神廟卽在寢殿行禮朔望亦然一片瓦礫惻然傷之何以妥神靈而邀福庇也爰集邑紳雷君育德等二十餘人到署商確重修之舉僉曰現值軍需未靖兵差絡繹官民交困力有未

支且工程浩大所費不資非廣爲募捐斷難集事有不得不暫緩之勢於是遷延者五年至同治三年夏各省軍務稍息連歲年穀又復豐稔自當及時興修以昭誠敬復邀諸君妥議章程除余捐廉倡始外敬立募疏若干本囑令紳耆設局募捐董理其事是年五月起八年九月止一律告竣共募捐銀二萬餘兩計修寢宮一院上樓五間下窰五孔東西房六間捲棚一座左右耳房二間則因舊貫而新之正殿五楹捲棚一座左右廡六曹土地祠十八間轉生堂鄠都城各二間戲樓一座左右門樓上加鐘鼓

二座皆徹底更新之至正殿捲棚前加接甍樓一座及兩旁新修碑亭各一間也他若重修者如外院左右門官房各一間左右遊廊十八間大門五間玲瓏牌樓一座以及所環牆垣東西門樓二座並神馬二匹也卽對面照壁八字牆東西過道牌坊二座亦間有補葺又寢宮西院上真武樓五間下財神密三孔捲棚五間左右看樓各五間戲臺一座臺後門樓一座非廢者興壞者修乎寢宮東院則有正房三間東房三間門樓一座爲道士室前有竈君府三間東西房各三間門樓一座爲社寓所東偏場內

又新修戲房一院大門一間正房東房各三間南馬棚二間西小院內亦修戲房三間廚房二間共塑神像百有六十餘尊亦皆丹之燠然一新統計前後五年各紳董不辭勞瘁逐日輪替督修俾得成此大工夫亦可以對神明矣從此神有所依其靈必著將見捍大災禦大患善者錫之福惡者降之殃皆於冥冥中主之謂非溥其利於靡窮哉落成後諸君懇余爲記因備紀其巔末泐之石以垂久遠云至董理之紳耆樂輸之善士例得備書附刊於後並誌不朽

平遙縣修城開濠記

冀唐封

平遙古陶唐地堯初爲唐侯所封本名陶後魏避太武帝諱改名遙隋開皇初析其地爲二一名清世大業末復省焉唐高祖龍興太原漢時平遙屬太原郡且距今太原縣僅百餘里故遙屬叢林古廟及碑誌古跡多唐時留遺聖廟尊經閣楹聯云魯壁千秋縣俎豆唐封百里慶絃歌溯本源也縣城周十二里八分四厘共六門南北各一東西各二上建重樓周城建敵臺七十一敵樓六十九南城建魁星樓一文昌閣一東城建高真廟相傳周卿士尹吉

甫北伐獯豸所築將臺是也詳考縣誌吉甫始築西北二面前明洪武三年周城重築併挑濠焉後至景泰初至明末增修補築者共十次

國朝康熙四十二年西巡輦蹕所經重建六門大樓自是屹然名城金湯鞏固矣邇來百六十餘年風摧雨剝日就傾頽濠橋填塞幾無形踪而南城尤甚道光己酉秋巨盜數十人夜劫多家踰南城而去時邑侯朝邑李公也庚戌春江右菊士劉公涖任甫下車卽訪獲巨盜劉黑小數月後政平訟理乃集紳耆而議之曰平邑地當孔道人民富

庶往歲盜劫實由自失藩籬亡羊補牢其今日乎衆曰唯
唯於是邀集紳商剴勸捐貲時唐封家居讀禮因撰城工

事宜十二條呈覽蒙公謬許令從事焉自七月開捐至十

一月捐至四萬餘金乃稟明各大憲委太守保公諱齡來

遙勘驗保公疑曰大雨時行工將如何唐封應曰此地工

自工而農自農縱用多人不妨農事保公以爲然議遂定

爰妥議章程設立公局勸捐者則有少尹趙德漳胡廷華

經理總局者五品銜王調宇都司銜李正華候選訓導冀

紱榆社縣教諭郭朝翰洪洞縣訓導劉充實候選教諭侯

配金提舉銜趙存錫五品銜雷育德遊擊銜李錫五從九

銜冀烈章千總銜王丕基及唐封共十二人六門則各設

一局分理其事而諮謀詢度總司大綱公爲之主於是庀

材鳩工經之營之斯千之詩咸入詠矣方冀功成報最榮

膺三遷何期廣厦未就哲人先萎七月初公右項發疽雖

不視事猶慙慙與封等論城工事十一日封等入署問安

公泣然曰日來病勢頗重恐不能與諸君共事第吾首倡

斯舉六城樓匾題吾已書就他日樓成宜泐吾名也封等

敬諾且慰勸之十三日玉樓赴召閭邑士民如失怙恃焉

越數日甯羌李公國瀛來方而月遽去嗣遷安兩農萬公
諱逢時來蒞任三日即率封等周城閱工閱畢謂衆曰遙
邑爲古邦畿故城垣較大且係西南六省通衢今茲之役
誠要務也前令旣創始之吾當繼成之諸君其勉爲之萬
公爲人誠樸平易近人每有稟白無不曲從由是上下交
孚趨事更易首南門是門瀕臨河濱地勢窪下乃因舊基
而增仞尺次西門東門北門次第撤建外城之坍塌者悉
易新甃而包砌之裏城則益土而補葺之四隅敵樓則較
舊制而高廣之其餘則照舊數而重建之周城開濠立閘

砌石橋七道引河水注之沿濠多栽楊柳以培生氣每當
風清雨歇登城一望岑樓虎踞河水龍蟠橋頭步月柳下
聽鶯萃靈毓秀萬世永賴矣落成之日萬公以事去宰遙
邑者興國劉公諱登雲也是役也經始於咸豐元年春告
竣於六年冬官經四任序易六年工料之費十二萬緡有
奇紳商之慷慨輸將固爲義舉即列侯之勞來勸相六門
之會計工料昕夕監視封等十二人之委婉勸捐經營籌
畫亦有微勞焉於戲懋哉吾嘗謂大工大役之興有數存
焉是舉也前十年而爲之不能也後五年而爲之不能也

平遙縣志 卷之十一
無劉公之倡義士大夫之急公亦不能也蓋道光末年遙
邑富庶爲盛故易舉耳而吾因之有感矣易曰先王設險
以守其國又曰重門擊柝以待暴客孟子曰地利不如人
和今茲多事之秋峻垣深隍誠可守而有待矣使不以人
和爲務而徒險之恃恐出乎反乎委而去之有負此長城
天塹也是所望於宰吾邑者之賢父母耳 唐封 因前記未
詳事實用作是記以勸將來且使當時官紳六年辛勤不
致湮沒云

冀毅齋墓表

王 璠 石和

平遙冀子諱魯字毅齋從余學於晉陽書院余旣旋里復
負笈於孟告別歸省至家即亡距別余之時僅五日踰月
余始聞信而哭又踰月其叔君聘來求表於墓余大哭死
生人之常余所以痛毅齋者以毅齋固孝友人也其生平
氣誼經濟文章無一之當死而卒以篤孝故致死死猶能
以英魂出奇令余追念其生平之氣誼經濟文章不禁西
望出涕於無窮也毅齋爲武孝廉諱君錫子孝廉善事其
父諱儼處士公撫諸弟甚摯命毅齋與其叔君聘同學於
余友愛相得無閒竊意能友者必能孝此毅齋爲人之大

平遙縣志 卷之十一
節與人交然諾不欺無賢愚不肯以色忤而不奪其胸中
黑白之辨有時談天下事及論古今成敗津津出諸口予
嘗高其誼而逆其才之有以用知非章句迂書生所能爲
之一二彷彿也少嗜韜略偶應武童子試冠一軍督學使
見其文而奇之惜不當以鴻才角技勇歸卽詣學博告棄
去就余問舉業初閱其文汗漫無歸不可繩以舉子業尺
度數月淘汰漸淨乙卯歲大比以國學生入闈文爲司衡
者所識賞旣以微疵見放益自奮涵肆於前輩大家而得
其高明果毅之氣同儕交讓爲不可及擬其必捷乃於辛

酉六月二十六日忽以父病召歸星馳未及家三十里於
鄉人得孝廉凶信痛墮馬下入門一哭卽絕絕復甦閱三
日而死旣死而兩目視家人多端撫祝如故叔君聘爲取
族子立嗣乃瞑然每至夜分大聲呼苦於院家人與之語
不應止復呼蓋孝廉主冀氏宗祀所生止毅齋而又無子
自恨其所負未展於世一抒其顯親揚名之意俾孝廉之
宗祀得所托以傳於後世故目雖瞑而心未瞑憂虞憤懣
之氣不得伸於人間至鬱爲苦痛大發於厥聲有悽絕也
余嘗疑人死之無知讀傳載荀偃以不復嗣事齊卒不瞑

爲奇今觀毅齋事其奇同而竟悲聲顯聞於人如生爲奇
絕可知古今來有心人深慮家國之事至死不變有如是
也至是乃不敢不以人死之知爲有嗟乎毅齋之友愛以
及氣誼經濟文章余知於生前而篤孝乃得於死後然惟
其孝之篤益信其友愛非誣而氣誼經濟文章皆有所根
非徒矯情飾貌博浮名於世好而已也君聘歸讀余文於
墓復爲余告毅齋之靈日子之文章何難取一第天靳不
得用而徒抱其氣誼經濟以死然天能死子而不能死子
之孝子死於孝而子之文章固自在也其氣誼經濟亦得

託之以不沒於人口毅齋其無恨毅齋又喜音律善琴工
真草書法臨懷素大草有得在孟時嘗爲余寫芝角山廟
碑記端楷可愛而未鐫毅齋名余方別磨碑以待毅齋書
而毅齋竟亡

增建義學碑記

閻泰和

交界道旁之土堡環圍六邨之禪林也偏門之右爲茶房
左爲廟宇隔道之東爲樂樓制甚善也堡內舊建正殿南
北樓東西廡獨南位缺然爲隙地曩因借養驛馬騷擾不
堪里民控呈上憲蒙批飭禁爰議公立義學鐫石垂後歲

壬戌春六邨彙集翕然同心先設

至聖諸賢神位妝

塑奎星神像繼而增新葺舊繕營學舍庖廩之次正當其缺中唐壁立以象泮池門坊外廡無不備具工竣釋菜謀勒石走使丐文於余余以建興學校爲典至鉅因樂爲之記焉古者家有塾黨有庠州有序國有學虞夏以來皆可考也昔袁州立學盱江太伯爲之記大旨以教學之意在於敦詩書譚禮樂而礪忠孝之大節不在於弄筆墨以徼利達而已也余於是役亦云且 國家偃武修文廣之學宮督之學政風化邳隆矣茲迺聯六里爲一鄉合異地爲

同學鄉鄰風俗之美莫此爲盛於以知

聖澤汪洋涵

濡漸漬者深也後人克承厥志時加修葺俾有舉而莫廢則人才蔚起薰德善良其教思正無窮也豈特被一時澤一鄉而已哉是爲記

重修文廟碑記

蔡亮茂

平遙古陶地帝堯始封於此是即中天文明之所肇也周宣王時命尹吉甫北伐玁狁曾駐師於此將臺遺址尙存詩所云文武吉甫萬邦爲憲者也魏晉以來文教漸盛人才輩出歷元明以迄 國初制科有人亦尙磊落相望迄

於今數十年間忽就衰頽是豈地不靈人不傑與抑亦振

興之無由也歲庚寅茂自崞縣調補茲邑展謁 文廟殿

宇傾圯慨然嘆曰是尙能安 先聖之神尊師重道以

聿興文教乎四顧中庭見木石瓴甓之屬縱橫錯置詢於

衆知前令德君將葺治而未備遽去官衆咸以艱於經費

告茂曰整治學宮固令責也安得以費艱已耶先捐俸爲

倡衆亦無不踴躍樂輸擇紳士之賢能者董其役一切經

費不涉官吏茂但規畫措置而已隨拆隨修落成一處每

以乏經費告茂又如前措置若是者再四經始於庚寅歲

事於乙未歷寒暑數載糜白金七千餘兩若明倫堂若東

西齋若尊經閣若神廚神庫若東西掖門若東西碑亭若

東西官廳若東西遊廊若禮門若義路若石闌若忠孝祠

若賢侯祠若齋宿所若省牲所是新建者若 大成殿若

東西廡若 崇聖祠若名宦祠若鄉賢祠若戟門若櫺

星門若東西綽楔若泮池是修舊者秩如煥如廟貌維新

可以妥 先聖之神矣爰進諸生講學論藝月有課季

有試第其文之甲乙并示以德行爲先化剛勁之舊俗振

彬彬之新規於是一時登賢書者四人中副車者二人步

南宮者二人前此科目衰頽忽然生色矣文教漸興衆志
悅服又進諸生而告之曰平陶文運肇自中天沿及晉世
如子荆興公安國父子祖孫文詞淹雅風俗高峻世濟其
美他若忠節則任良弼范道行劉三元諸人孝行則郭文
恭任良才任義張榮李憲邵希曾梁殿邦諸人至若杜文
定公受業魯齋得關洛正傳立朝忠亮爲國司直真聖賢
之徒也卽金元之世多武貴冠蓋節鉞勳名爛然皆遙產
也方今 聖天子卿雲復旦遠配唐虞諸生果克上師
前哲各自樹立以備柱石干城之選詩所云文武吉甫者

再見於今矣豈特取科名服金紫誇耀里閭乎哉 茂於乙
未歲之孟冬量移太原郡丞將行邑之紳士以碑記請自
媿不文而重贖其意因備述重修之艱且以鄉前輩之文
章忠孝理學相勉勒諸麗牲之碑并系以銘曰峩峩超山
滾滾汾川惟古陶地文肇中天風土瀟茂用啓後賢云何
近日士氣弗振顧瞻鬢序頽圯疑塵是修是飾廟貌維新
尊崇道術文武璘彬英賢輩出觀國用賓永久弗替用勒
貞珉乾隆四十一年歲次丙申季夏月吉立

重修文昌閣碑記

五臺 徐繼畬

平遙城牆東南隅舊建文昌閣閣旁建魁星樓階級由城內平地迤邐而上望之巖崑雲表下有戲樓每歲二七月上旬獻樂祭神事頗鄭重年久不修風雨摧剝無完宇牆垣亦皆墮敗幾成廢祠咸豐元年大修城垣亦未暇及此邑紳士謂修城所以禦暴而文昌魁星兩尊宿關係合邑文風不宜偏廢且城垣一律完整文昌閣巍然城隅獨破損不完新衣敝冠尤非所以肅觀瞻而表形勝乃於合邑募緣鳩資人有同心工成不日樓閣牌坊一律完整金碧煥映又以蒼頡爲造字之祖新建南房三

楹以奉香火東西偏各建遊廊耳房照壁戲樓亦重加修葺又以東偏有餘地廊房後接蓋東房三間東北隅建焚字紙樓一座牆垣數十丈亦徹底修築翼然煥然非復曩時蕭索氣象矣工竣將泐石以紀歲月而屬余爲文余謂我國家偶逢厄運兵興已十餘年然列聖深仁厚澤浹九有而暨八埏今當聖主改元五星有聯珠之瑞東南必魔小寇亦漸次剷除從此偃武修文復見太平景象而諸君子之重修文昌閣適當其時吾知珠氣奎文且先曜於茲土而文教蒸蒸日上也故樂得而爲之記同

治元年九月二十二日文昌社董事人公建

平遙縣築城開河記

并序

高錫琳

夫使巖巢馘乎羽翮彎環裹若龍蛇鬥紫絳於遙垣距赤黃於恢網必且墾黃壤而輦沃鍛白石以成泥構瓴甌於中唐稽隕薨於周葉斷雲根而砥之腳欲其重也糅土沙而杵之腹欲其實也重而累上馘馘而摩空頭欲其昂也錘者畚者繩者版者躋焉降焉藜鼓聲如督戰焉聚笠而謀珠流浹背嘻其憊矣議者曰是役也不如其已也厥任重厥功賒是周鼎非九九八十一萬人扛之不能起也是

秦宮卽三百六旬有六日倍之猶難就也抑或矢勤矢慎罔誚寘薪浸假力衰末路必將功墮半途茲時也茲事也固萬萬不能爲且不必爲者則不如其已也應者曰唯唯否否必若所云是青眼古人而白眼今人也是危且不持顛且不扶將胥宇內之言言而仡仡者而畿府而郡縣而洞穴之而傾圮之而蕩掃之以歸於盡始快也且春秋一冊如某年城某我孔子大書特書不一書欲以示一時而垂萬世者之皆多事也亦左矣哉蓋聞思患豫防者惕厲憂勤之至也有志竟成者功苦效驗之因也烏未陰而綱

卷之十一
繆牖戶蟻不雨而慎固垤封是亦計之太拙者倏焉電掣
雷轟雲垂水立而烏與蟻與其鄒卵且安處巢穴故曰有
備無患也且夫海市也蜃樓也蓬萊方丈瀛州三島之金
銀宮闕也上及天邊之玉閣雲外之藍橋與夫廣寒清虛
之第宅也人不能爲仙與神能爲之今之百尺參天與麓
峰戈嶺相拱揖者又仙與神所不能爲必待人以爲之則
明府此舉亦爲己之當爲而已亦爲人之能爲而已吾子
且嘏嘏焉是止知目前不顧後來此何異清歌漏舟之中
痛飲焚屋之下不且烏與蟻之不若而神界僊窟之果不

從人間來也其然乎其不然乎客語塞赭顏走由是事卒
興而功卒成傳有云美城之大名也子孫不忘今而後子
孫真不忘已又况民保於城城保於池其憂深思遠者爲
一勞永逸之計乎余感明府大役旣興齎志以沒諸君子
能宏遠謀卒與二尹趙君繼明府來者萬君相助有成也
因紀其實以示諸公諸公曰善命鐫碣焉其辭曰國有大
臣天子憑之爲鐵壁邑來名宦地方倚者如銅牆歸金城
於聖王長沙太傅詠德城於宗子大雅凡侯西秦主萬里
金湯閱再傳而社屋東號君九州巖邑不數稔而骸枯山

海依然風雷轉眼迺者月令七十二候築宜仲秋周禮三百餘官職頒掌固楚城芊武不徒漢水爲池周城姬文恰好作豐伊匹於是雄誇五丈愁殺樓郎固擬重圍絕將燭武以德若彼以險若此雖然葺睢陽之雉堞風雨華元合蒲屈以鳩工寒暄士爲此功莫難於倡首而事惟賴乎有人也則有金井波澄鳳凰臺迴恢恢巨鎮洞達六門轟轟危垣周遭十里其間廡廳之爽塏版庫之蓄儲狴犴之牢籠駢馳之羈旅兼以人才自古東西膠帀地菁莪

聖

澤到今千萬代一池芹藻外此忠祠義殿梵刹僊宮莫不

裏入金甌盛來玉塞豈徒珠屢錦市敞綺麗於通衢白屋朱門雜人煙於夾道也哉祇以箕畢億萬家轂擊肩摩之地歷元黃二百載鏡清砥平之天江海長流淘殘石室英雄一去鑠碎金臺昔日擎雲蜀道之猿猱失色今朝塌雨淮南之雞犬欲僊甚而翦就飛鳶禡子則春風戲紙以故提來籠鳥狂郎亦晚照娛青不梯而可到上頭綠林客覲覲久矣無翼而堪凌絕頂崔澤人徑竇昭然遂乃四野風悲三更月苦重門鍵穩不須鑽穴偷來一闋夢酣遂爾揭竿直去蘭膏熄處擣開白版七八家松火明時揆得朱提

幾千兩時道光二十九年九月二十五日夜也事聞縣尊某鑄級焉

天子允西江劉君來其人也以卯金之右族薄子玉爲麤才杜拾遺廣厦萬間斬寒峻同歸庇蔭白司馬巨裘一韻祝編氓共荷併幪今者往事聽來荒垣蹋遍石如解語壁定鳴冤嗟射者之栖皮鶴傷竟體悵老僧之棄衲蝨竅渾身看來樓櫓欲搖宛低頭而將謗取是女牆半秃若崩角以待蘇不覺瞿然曰城之頽官之慝也魯者渠郊郛劣申歲傾巢偪地墉完午季解瓦非其人則守陴亦哭然而鬼伯擒難武丁三祀崇侯俘阻文甲再披負

乎固則懸布誰當旣而執簡邀賓運籌佐我侯鯖酌蟻商量於竹葉杯中蘇蠟憐蛾誣諉到蓮花漏下當是時劉寵以安民爲己任百堵恨不皆興而宋清因輕利播人間幾家何輸往哲公乃簡冠帶之南金東箭署姓名於子亥一周各網羅乎仲雪伯霜拋瓠泣於辛壬四日俾夫某某選名材於夏貢某某訪東版於冬官某某繕記室之簿書某某考工名於物勒不特此也蚨飛來而不集官手况他吏社鼠而役城狐蜚化處則盡是民脂替我惜蠅頭而權鷲眼此則定中揆日不難葳楚室於文公自然經始趨風親

見落周臺於岐伯豈不快哉豈不快哉而乃蔽芾有棠平安無竹古今來好事難成善人不死類如此夫嗟乎南仲星沈誰計朔方之保障樊侯風逸疇營東國之藩籬而猶幸國老臨歧身後之纏緜不少將軍永訣麾下之抖擻倍增諸君子乃翁然而興也道我心匪石衆志成城旣按部以就班必分甘而共苦九百畝爲同井八家蓑笠甲非惰而乙非勤六十輻扶全輿一字輪流左不勞而右不逸何況召父甫去杜母旋來爾乃燕地名流唐宮進士隋敦煌之驍將今古異名漢子夏之雄風滄桑同姓數去金貂七

葉華胄遙遙栽餘琴鶴千花河陽落落東山忙處冷澹圍棋士行閒來倉黃運甓悼龔黃之埋玉何日重返石贏喜王貢兮同舟戴星何慙巫馬則又不特君子之成美抑亦同寅之和衷也已然則諸君積小劔山成大劔山之形一簣何虧人說劉郎去後而當路以新令尹續舊令尹之政十分無負我誇萬楚來初信故鄉之杞梓材饒况宦海之淄澠味合一則幾百季外及競執前一則十萬軍中旗爭殿後馬新息鍊銅爲柱巨擘千秋李贊皇籌邊作樓小心一味定卜影沈惠濟河伯喜逢新交果然氣射超峰石兄

忘是故友繼自今下以奠閭閻於草莽大則扶社稷於苞
桑狗盜雞鳴難逃一百餘重關險龍蟠虎踞請看七十二
處樓高未幾而開河之工竣 城以圍民也然既圍民尤
在圍城城益固民益安獨是百物叢中五行隊裏火真烈
士水是懦夫披蠹簡於咸林玩愁東里獵蜩文於妣氏弱
傍西河無論躡泔不可濫觴坳堂止於浮芥就令汲重淵
之脩綆不過茗客澆杯挂百丈之飛泉第供稻人抱甕語
夫三千虎賁十萬貔貅渡戊午之津周王六步七步整甲
戍之旅魯人三遂三郊何可當乎而不然者今夫乾坤邈

矣不過一十二萬年華有滄海以流古今世宙竟分表裏
覆載茫然大抵南北東西界限有長江以劃離坎鬼神亦
有隄防他若梁州黑水秦地黃河若雲潭若湘潭三千界
鳴舌蠻音之霸國卜澗水卜灑水八百季龍興虎視之神
京城之有池權輿於此雖然有城無池如勿城也有池背
城如勿池也先是城之南河從上遊來分派繞城流如環
然各門輿梁通往來經久陵谷遷移河失故道橋亦陷入
地中河水遂從城南東匯惠濟城則是而池則非矣我明
府擬築城後尋河舊蹟未逮嗚呼好官愒逝是孰積薪義

士雲興蹤他建樹惟城圍民惟池圍城池恃城爲黨援必
蜿蜒而成帶城與池若虞虢亦脣齒之相鄰惜也古昔橋
痕不可復識矣已乃如覓遺金如訪故友於彼於此將信
將疑蓋至此不下數十百人手足荷插以從焉而果也雁
齒六門掘從地下虹翳十丈重到人間嗟乎寶劍埋塵久
沈物色英雄失路強入搜羅士有抱濟世之才而使銷聲
匿迹不見量於人世亦如茲橋哉然而橋固無恙也從此
隱者見矣舊則新之教他弓影波橫濟人於蛙鼓官私之
地際此江城畫好屹立在鴻飛滅沒之鄉於斯時也秋水

一潭鯨牆倒影春風半壁胥浪搖天潮聲挾睥睨尤雄峭
影借煙波作勢壯哉擬之晉離故絳傍汾澮以靡涯吳穿
新渠通江淮而更闊池哉城哉池哉抑有說焉在魯
魯洙浚而慨無鳩梁宮溝而悲失鹿鄭瀕溱洧何術捍荆
衛倚河濱無緣支翟與爲澄江織練三刻或可踰來孰若
德水成川百身誰能飛去說到津通億載陸機真典午名
流何嘗霖渥三朝傳說免呼癸良相所望後來潘岳異日
魯恭挾韓潮蘇海之才居讓水廉泉之地握激濁揚清之
鑒杜隨波逐浪之緣庶幾哉不水洪波全憑此一腔熱血

君子曰不圍之園無池有池即無城有城矣文旣成或戲曰故人南郡去去索作碑錢杜老如斯云矣先生其有意乎然而韓柳齟齬輸他宰相擡高錦字三千皇甫湜或者庚徐沈潛遲爾名儒踴倒蘇碑四六段文昌余曰然備錄之

補修縣治誌

錫良

古陶地肇堯封夙傳勤儉迨及後世逐末者衆宇峻牆雕金輝碧映民居以華侈相競而不知其僭也長民者當奢宜示儉之時苟再從而導之勢必靡所底止顧陶署失修

則亦有年矣棟宇傾頽厯任僅隨事補苴豈皆傳舍視之歟蓋所事者大無暇及此抑所費者奢無力爲之也予於庚辰夏蒞任堂壁四立上幕以席每風雨之瀟瀟睹巖牆之岌岌竊憶中天之土階茅茨亦不至如是之陋且極也惟予以樸訥之才心勞政拙又當暇後方休養生息之不暇其何忍以土木累吾民居半年適有公款若干金可資以修署詳蒙郡檄迺延劉君泰沅等三人董其役鳩工庀材克日興作凡一切梁棟瓴壁之屬與夫土工木作平給市值惟堅惟樸祇期爲經久計且欲示民以尙質也從此

登登馮馮八閱月而工未畢會予有量移首劇之信爲予
謀者曰可以休矣幾曾見客燕經秋而尙銜泥營巢者乎
予思事之圖終難於慎始迂拙性成凡欲行其心之所安
而已在事者體予意嚴督之不日告成計改修二堂連房
東西廂房宅門屏門內外廊房東院平房南苑廳茶寮各
若干間其餘大堂以及前後各屋宇補葺有差是役也經
始於載陽之月落成於隕籜之日工竣予亦將束裝就道
爰徇在事者之請謹誌歲月并督工之勞勩云

汪縣尊修古蹟培文風經費總碑記 趙 煥

運有否泰學無古今苟造詣之極精斯科名之游至不思
造就而漫講風水未足憑也維我古陶地號名區士多先
達考康熙四十五年所修縣志輿圖人物紀述綦詳自是
以來幾二百年勝境半就荒蕪俗情競趨商賈遂或歷數
科而無一獲雋者豈果鍾毓之無靈歟抑亦藏修之未至
耳錢塘汪公來涖吾邑頗懷好古之思夙具興作之志於
是諸紳士之進謁者僉曰欲得人文之煥發須擇地勢以
經營文峰塔宜改建也奎星樓宜變置也賀蘭橋鳳凰臺
亦宜次第修理焉爰謀捐貲遂成盛舉從此鵬搏得路及

秋賦者咸分桂窟之香雁塔題名赴春闈者喜與杏花之
宴我同人尙共勗之以無負縣尊振興之至意是役也始
作於丙子之 月告竣於丁丑之 月約費若干金惟冀
君午亭實籌畫之己卯六月汪公調任陽曲瀕行命午亭
勒捐貲之姓名於石以詔將來午亭囑余誌其巔末余不
獲以不文辭因援筆而爲之記

重修公館碑記

劉韻庚

平邑四達之區也東拱 帝京西連秦蜀南通太行北
入雲中雁門龍節虎旗馳驛犇輶以去以來絡繹輻輳者

日常以十數計寅賓館之設亟矣哉縣治之南舊有公館
三所年久傾圮幾不足以庇風雨邑侯汪公蒞治之三年
政通人和百廢具舉爰集紳耆而謂之曰方今大綱小紀
治具畢張而平邑路出孔道以隸人之館羸賓客甚非所
以重王事敬使臣也宜有以新之僉曰可乃命紳耆劉泰
沅^等鳩工庀材凡堂廡五楹東西房各三楹過廳三楹東
西廂六楹儀門大門如制此大公館也二三公館亦大略
弗殊茲役也歷三寒暑而成費錢伍仟八百六十仟零按
四鄉之官馬取給焉工竣命^庚記之竊思今之居官者大

抵視官若傳舍孰肯勞其心神而乃自文塔古蹟以及河道橋梁凡有關於政教民風者無不一一修之古之人所居一日必葺其牆屋良有以也今而後過之者覩開闔之高牆垣之厚未嘗不動念曰是賢侯所經營也是民力之普存也而能使人鄭重若是者則又我國家久道化成涵濡淪浹故樂事勸功也將至自京師者銜天子之命思何以盡其忠至自秦蜀者懷天尊之嚴思何以補其過則忠君愛民之念必油然而生愈不能已也遂承命記之書於石

烈婦郭羅氏墓表

自古婦人之道從一而終顧守節難而盡節更難維茲羅氏何其絕類離羣也當其夫得病在床卽矢死而靡他及其後夫病旣篤先自經以示信是爲天地之浩氣女中之丈夫也激烈昭於當時芳名垂於後世故勒諸貞珉以垂不朽云道光甲申年桃月上旬六日立

平遙縣志卷之十一
 藝文志下
 五言古詩
 征西官屬送於陟陽侯作詩
 晉孫楚子荆
 馮翊太守太原中都人司馬駿為征西將軍與楚
 善起為參軍至是楚遷馮翊守官屬皆送之而楚
 作是詩以別亭侯者也
 晨風飄歧路零雨被秋草傾城遠追送餞我千里道三命
 皆有極咄嗟安可保莫大於殤子彭聃猶為天吉凶如糾
 纏憂喜相紛擾天地為我鑪萬物一何小達人垂大觀誠
 此苦不早乖離即長衢惆悵盈懷抱孰能察其心鑒之以

詩

五言古

征西官屬送於陟陽侯作詩

晉孫楚子荆

馮翊太守太原中都人司馬駿為征西將軍與楚善起為參軍至是楚遷馮翊守官屬皆送之而楚作是詩以別亭侯者也

晨風飄歧路零雨被秋草傾城遠追送餞我千里道三命皆有極咄嗟安可保莫大於殤子彭聃猶為天吉凶如糾纏憂喜相紛擾天地為我鑪萬物一何小達人垂大觀誠此苦不早乖離即長衢惆悵盈懷抱孰能察其心鑒之以

平遙縣志 卷之十一
蒼昊齊契在今朝守之與偕老

清虛觀遊仙詩

明 范道行 太衢

大道鼓羣品鉅細含元氣鑿志雕冲元養德全和粹夸毗
天天年至人獨秀世元神苟無虧不死良可冀鴻濛開寓
縣赤松爲兩師黃帝訪崆峒大隈隱具茨姑射歷冰雪王
母臨瑤池老聃葆谷神關尹識其奇元文五千言靈光照
萬期王喬棄人世弄月緱山巔一遇浮邱伯千秋凌紫煙
琴高吸沆瀣清虛何泠然青天御赤龍萬人爭喧闐浩蕩
安期生採藥蓬萊上海樹晶丹霞天風卷白浪東方度紫

淵鞭虎遊潏潏朝去暮歸來空爲神母愴帝皇不能知奇
縱本宏放麻姑自天姥方平亦神人導從一何都麾幢軒
高旻共言浮世事局促不足陳三度見清淺滄海行揚塵
峩峩魏夫人修真領南嶽西華秦毛女飛行出寥廓近世
有真人授道登上清發枕得鴻寶吹簫學鳳鳴紅顏生羽
翼丹臺留姓名一朝遂冲舉人貌而天行復有文章伯綵
毫一何綺琅函啟靈媛北面稱弟子萬事脫手空知滅羣
動止向來飛揚意蜩蟪盡枯死采藥碧山阿選石青谿沚
造化有至寶朗秀天門開精花發麗藻聲名鬱崔嵬太白

豈凡骨淮南固仙才英雄一掉臂逍遙絕蓬萊小儒昧大道禪蝨與醯雞幽元出塊北欲叩無端倪何況擾擾者七聖終然迷求之不可得往往謂迂怪慾火煎其膏塵沙棲其帶身坐晷刻中目營千歲外黃河奔不休白日吾將奈憐予滄海東四十抗塵容半生費心力慚愧工雕蟲年來厭馳逐息影憩長松丹經苦難入石髓不可逢空念留皮骨誰爲鑿心胸潛焉涕淚下傷此浮世蹤何當遂西走立稿終南峰

卽事寄秋香居士温先生

傅山青主

温生盡地力今之古君子黃冠多孟浪而能聞之喜信心帶善根願力不肯止兼解形家言起伏論千里往遊先生山陪我曳屐齒雙橋映老眼幽討正爾爾饑食紅山果意興得其使使之得其至至之非其指

超山西莊

劉岫朝邑思齋

西莊連一山澗水割東西鑿石穴居穩列樹學巢棲種禾高山巔汲水下深溪谷轉人不見但聞午時雞巔上松如蓋孤煙與之齊欲捫藤蘿徑不得通輪蹄

清虛閣

陸豹雯蕭山左臣

城隅興國觀清虛聳傑閣有唐自高宗千年溯開拓東來
接太行北去望沙漠環繞者中都鬱鬱麓臺壑古柏疊蒼
翠偃仰如龍蟠陰符秘豐碑草書半剝落銀榜懸雲浮寶
籙資冥冥安得白玉仙御風跨黃鶴妙說丹砂訣餐霞挹
葵藿王粲漫登臨思鄉一寄託週迴還四望疆井俯林薄
媿乏作賦才躊躇慚康樂

丙戌四月五日雨

王

綬蘭州
誠亭

八年七夏旱勞心如焚絲亂緒不可理茫茫天難知麥苗
三月枯千家半啼饑秋禾種未佈入夏絕耘耔民病吏亦

病沈疴無良醫賑貸詎王政流離空疇咨董子湛經術繁
露存禱祠抑陽縱羣陰舞雩崇壇壝火龍祀南陌繪旗標
方池三日雨如澍霽霽盈中達萬井蘇氣象郊原徧鋤犁
有感信必通理數潛轉移節使行之效爲作喜雨詩
大中承噶
公齋宿步禱一依江都
之法三日雨遍山右

棲真庵贈孫道人磐石

黃繼懋

叔章
驛宰

疊嶂如四壁流雲頰半川卜宅臨中野樓閣在青天時時
紫霞起飛鳥載其偏已疑塵市外倏歛赤城煙破帽籠鶴
擎翛然一神仙南指麓臺翠俯臨汾曲遊日予好此者優

哉養歲年黃金不可就白日去難旋聊得此中趣掩戶但
高眠

七言古

權店山中遇雨見民穴居感賦

明唐登雋 四川

攬轡行來堪感額山容鶉結無顏色一望荒邱盡土扉雨
裏煙迷人斷絕活活塚居士一撮那知人世有樓閣口饜
糠糝不充腸那知人世有膏粱白藏花六漫瀾天僵卧何
從乞米錢到此愁聽雨鈴曲倩人好繪流民屋我行其野
不成寐忽聞土室人酣睡比之猿猱差一般天地之大猶

有憾

清虛觀三柏歌

張開宗 杞縣
潛谷

太平興國觀三柏骨勁項強勢參天莘野先生老古錐謂康

先生摩娑相對真相憐爲囑河南張少室試一拈爾筆如

椽蒼虬歲歲吼風雨皮腹脫落露奇妍不須倒掛幽岩下

地可同久天齊年黃蓋峰陰漢將軍大兒小兒堪比肩撐

柱乾坤穿煙霧雄姿怪幹何蒼然不見蜀相祠前樹物誠

不朽以言傳安得昌黎雄筆與杜甫寫出支離矯健之飛

仙

大風刮雲彌日雨又不果

王綬

油雲作意山容毀狂飈激怒長空號揚沙發屋殊未已淨
掃浮翳騎陽高焦明不至黑蜮伏石尤扶搖恣雄豪麓臺
縣互赭童童汾流涸竭如火宮樹間少女占不應天市繁
星驗亦窮怪哉巽二爾何忌白衣歛忽同飛蓬彼蒼仁愛
竟如此忍使噫氣常紛靡疲癯扶杖哭荒塍長官束手徒
飲水我聞仲舒著繁露縱陰閉陽通理數一編開府聊敷
陳精誠看起閭閻痼去年憂潦今憂旱吁嗟吾民及此難
吏則不職民何辜舞雩壇壤空浩歎秫穀猶堪望晚歲耕
鋤莫遂憚勞勩願驅風母海之西十日滂沱絕疵癘

昭慶禪院贈相生上人

周鑄

山東
茗柯

我遊平陶昭慶寺曠懷一覽南山翠中有遠公講大還根
宗了徹西來意佛法空盡始爲空非非想化非非地相逢
各道本來身不作語言及文字知識誤却再來人青山流
水猶多事古今大俠卽大禪活水源頭皆一致孤鶴飛入
白雲中凌風縹緲知何自每從方外覓奇蹤我之志爲師
之志與爾相期最上乘不落人閒第二義

柏仙觀古柏歌

王綬

平陶十里西南行柏仙之觀明朱薨樵牧不至翦伐少老
柏得壽以仙名瞥見蒼翠浮天際近身拔地起復傾磊砢
盤掣幾千尺鬱曲剝蝕癭而清本根數人圍不得分枝參
錯猶弟兄一支北頭挺然立扶疏柯葉垂繁纓次東鐵幹
勢欹側欲趨未趨還力撐次南瘦削如髯叟羽騎鶴髦調
吹笙廣成僊佺呼欲下岸噴磅礴饒縱橫就中青銅蕩白
日聯絡行列如有情最奇老蛟西騰走鬚鬣戟張神魂驚
五丁力士不可挽攫拏奮怒凌高閎風雷震動儼回顧鬼
廷彷彿靈虬聲竒姿異狀絕不類仙耶柏耶難區評超山

俗吏對之飲徘徊一酌瘦瘠觥大冬嚴寒未彫改暑伏白
晝移陰晴甘子落階盈道氣香脂自服已長生天齊地等
閱人代泰和柱石直孩嬰一形仙化今如此荒唐秦漢疇
定衡吾聞孔明廟前柏霜皮黛色非凡英螻蟻鸞鳳杜陵
句愛惜奚啻錦官城又聞荊州與新甫詩書名號徒喧轟
土衰木盛爾何意支離偃仰同老僖真率無言長穆穆洪
蒙不鑿全幽貞巴東兩株亦千秋柏仙柏仙吾欲從爾蓬
山瀛海訪飛瓊

古柏歌

陸豹雯

麓臺山前新雨痕春郊芳草遊王孫西南數里揮鞭去川
 原明媚古胡村胡村田舍通長陌紺宇崑崙古仙柏天然
 一本五枝生十圍騰躍幾千尺蜿蜒蒼龍西倒垂偃蹇俯
 枕泰和石洪荒既剖誰植來歷數周秦莫能白彷彿疑有
 神靈集生死先期知興革土人相傳元明兩朝末年死而復生飽經霜雪
 幾千秋錯節盤根萬古愁食葉服脂真妙訣神仙何須滄
 海求吾聞秦官漢秩爵長松此柏胡為不受封又聞孔子
 廟前廿四株偶然砍伐直須與物生浩劫有時數盤踞得
 地無天殂太谷之柏應如此整襟肅穆澹容止主人坐卧

不欲歸為和新詩雜宮徵

古柏行

康乃心邵陽太乙

客路西來汾水東懸山超嶺青濛濛荒邨有觀委蒿蓬老
 柏兀然居其中五枝盤錯舞螭龍漠漠本根信鐵銅含元
 御氣拂蒼穹彭篋閱歷似嬰童春秋佳日多飛鴻不知植
 此何仙翁我欲聞之悵莫窮意者秦漢與封桐榮枯真有
 神靈通亦如檜在尼山宮我家莘野殊鬱葱大槐五月起
 寒風行人過者歎崑崙咸謂此木不再逢華山嶽廟曉日
 紅曲伸偃仰更奇雄河濱健筆補天工寫來却與此柏同

李岸翁叔則先生有華嶽廟觀古柏記文甚奇皋蘭文字薄雕蟲為令平遙歲穀

豐探奇作賦擬長虹前有眉山後崆峒作者幾人乃見公於戲爾柏從此載詩筒應與乾坤共始終

清虛閣仙跡

張開宗

清虛古閣幾千年麓臺如屏圍其前芻來絳闕之飛仙縹緲直下風泠然腦滿瞳方跨輕煙趺坐百尺高閣巔驚鳳遊龍書翩翩黃冠寶之柱陰鐫茂宰題詩詩可傳誰向黃鶴碎一拳我生脆如朝菌焉常擬絕粒尋僿佗漑月咀白誦玉篇命自在我甯在天洗心但使心景圓不受百感千

愁煎赤水霞城應有緣石髓松腴不用錢塵氛滾滾休相牽早棲名山鍊大還

公子行

康乃心

為梁文學霄作霄字灼漢故河州牧禹甸少子兄死遺子二其析產也二從子取六已取四霄素志也計所推讓殆不下千百金可以為難矣賦此以愧薄俗並告之採風者

我到平遙三月餘公子相逢慰索居酒闌却話長安事歸來唯有舊琴書

河州公先為吾秦長安令

伯兄去後慈親老忍向分財

計醜好推多取少事尋常使我聽之傷懷抱我聞鄭氏浦江號義門歷宋元明古道存又聞繆彤自擲心獨苦此事

今人薄如土紛紛面目盡豺狼除他妻子總參商公何爲
者獨疏狂甲第田疇同糝糠西河精舍月如霜去矣別君
歸故鄉悠悠水遠與山長於戲自有天公垂鑒如星芒

五言律

尹吉甫墓

韓邦奇

朝邑
苑洛

瞻仰周卿士淒其古墓門苔荒啼鳥跡草沒斷碑痕俎豆
千秋遠儀型百世尊空留臺畔月常照此乾坤

次平遙夜望二首

韓邦奇

寒雲低望遠朔吹暮聽哀煙火民風舊關城旅思催地連

燕代濶山接太行來欲詢賡歌處狂飈振落埃

其二

漠漠荒城署飄飄旅笛哀坐看寒燭盡愁絕夜更催冀北
花爭發塞西雁不來歲華容易改春盡且塵埃

次苑洛公韻

宋

岳 浙江
承山

獨坐清秋裏荒城落木哀風塵何日息節序轉相催野曠
看雲度窗虛待月來漢臣多李霍應爲掃氛埃

和承山次苑洛韻

蔣勸能

東越

寒日郵亭暮荒城畫角哀使輶猶未稅歲序已相催劇飲

平遙縣志 卷之十一
消愁瘴狂歌待月來願言娛永夜明發逐飛埃

早度上店嶺

宋岳

征輿當曉發一劍倚秋風霜葉紅千樹雲山碧萬重村童
喧汲水野老醉扶筇藩守慙多拙惟應喜歲豐

鳳凰臺

范道行

何年遺古跡鳳去舊臺荒想像懷蕭史勞歌憶楚狂碧梧
虛夜月翠竹冷秋霜不盡登臨意冥思千仞翔

登麓臺山

李瀚沁水人

誰謂雲霄遠躋攀有路通山川皆禹跡勤儉屬唐風佛屋

洪崖半人家邃谷中重華耕稼處翹首見遺宮

介之推廟

雷嘉祥舉人

多難從亡日閒關復國時股封心獨苦身隱祿終辭天力
將誰許孤忠止自知骨灰名不燼千載仰新祠

贈梁天一令臨穎

傅山

頗聞臨穎令今日甚循良錦縣多鴻雁花田歌鳳凰教人
織細布只是勸農桑方外何輕重篇章要老狂

過棲真庵贈秘宗道人

許汝霖浙江人

紺宇臨無地紅塵闕小天雲奇迴遠岫閣迴俯平川調鶴

人偏暇驅車客自憐買山期異日晞髮判殘年

棲真庵

陸光旭 浙江鶴田

不謂紅塵地幽清別有天黃冠多古貌綠樹結蒼煙山作
當楣畫鶯調帶雨絃應慙僕僕吏此枕尚盧眠

棲真庵和鶴田韻

陸榮登 浙江揆哉

昨感豐隆夢行經小有天鑪沿三代物闕迴九霄煙環堵
勞停轍高山寂對絃蜨莊隨處化欵枕不須眠

其二

豈有規宏敞徒安耕鑿天竈深應伏火屋遠自騰煙鶴奏

輕清韻琴調大小絃日教埃塽去永夜輟高眠

棲真庵次韻

王傑 江甯蓮洲

應是蓬壺客來遊小洞天高懷凌斗宿靜氣攝鑪煙花露
和丹藥禽歌弄管絃蕭然無所累一枕自安眠

棲真庵次鶴田韻

王綬

觀挹羣山秀峻嶒現一天溼雲垂遠壑馴鶴舞秋煙石裂
珠宮笛風清竹屋絃都來塵不染輪爾北窗眠

其二

界關仙居迴香圍兜率天黃冠無市氣丹戶起鑪煙地正

存堯景山高憶舜絃慙懃謝道侶他日買山眠

其三

耽幽憩勝地秋老雁橫天黃葉飛寒渚青山澹暮煙胡麻
香午飯廣樂冷么絃下吏羞勞役朝朝愛此眠

其四

野廟秋偏爽涼風白葦天疏鐘落大漠遠燒散輕煙紺碧
金爲象空明海作絃蜀琴倚鶴斲雅操坐忘眠

其五

呼吸通羣帝依稀尺五天苔深雲外兩樹老洞中煙勝賞

留筇屐閒情寄縵絃筍輿歸路晚鎮夕不成眠

其六

近縣塵囂絕樓真像帝天經過久鹵莽止憩抱風煙野乏
中牟穗家藏彭澤絃登高神倍曠起伏指龍眠

其七

三月傳佳會清明卜好天雛鶯新囀舌嫩柳學吞煙士女
喧車馬雲山雜管絃我來空自畫秋氣足幽眠

其八

文章豈適用老去晉陽天到處貪山色隨筇破竹煙輶

鳴玉井風雨咽鷓絃宮殿紫霄迴浮生記一眠

棲真庵贈秘宗道人次鶴田韻

康乃心

初謁元元帝歛如詣九天雲通王屋氣樹斷呂梁煙客去
經爲課風來鳥奏絃一真留邃古抱膝不須眠

超山二首

康乃心

超峰何處是十里路紆迴郵落桃源近雲門石徑開河聲
縣上去山色太行來白社匡廬下初逢惠遠才

純如上人

其二

百福維摩地層巖佛子家客來尋斷碣

豫山年兄

僧定愛煙霞

幽谷喧羣鳥山風掃落花題名留裕老終古照三車

寺得一石

爲元遺山先生題名手書

超山

劉 暉

一片超山色連天翠欲浮
淡旬常入夢今日始來遊
攀樹晴雲豁浴花曲澗幽
鶯聲三十里速客遍枝頭

其二

紫蓋臨深澗扶筇欲上難
低徊緣石磴矯首忽雲端
天澗諸峰小風高五月寒
細尋幽勝處引入坐中看

和康太乙劉豫山遊超山

王 綬

聞道超山好青蒼天際浮煙雲藏變態風雨阻招遊吏俗
塵氛隔情閒杖履幽何時一攀躋松月看枝頭

其二

歎息名山路三年舉步艱新詩剛讀過佳境鬱毫端秀色
雲峰發清光瀑布寒卧遊圖畫裏日夕飽相看

棲真庵訪秘宗鍊師

陸豹雯

苦被塵囂束棲真可避諠誰能祛世網卽此是仙源晚照
懸青嶂秋風冷漆園華陽真隱士聽誦五千言

縣署中喜晤康大太乙

張增慶
華州
厓湖

兩月違燕市忽逢玉署隈宰賢君子至酒設故人來聚首
鐙連夜談心月上臺主人留著述須盡馬班才

登清虛閣

王綬

孤傑清虛閣登同井幹樓閨風通海氣人語逼高秋山引
龍眠目雲書雁字愁茫茫元化在天地總浮漚

胡邨柏以其古也元人作柏仙觀以護焉邑侯蘭州

王大令詩以表之柏始傳矣

劉 頡

有柏老崇岡濛濛十里香根盤從太古葉發識興王內史
風流在神仙日月長巴東何所似爭欲比甘棠

超山幽居

際得松野釋

雨過千林霽開窗坐翠微蟬鳴孤樹靜鳥啄落花肥白日
催人老青山到客稀誰能同寂寞身世兩忘機

其二

名藍饒古跡泉石足怡情慢卷雲山色廚分澗水聲蒼蒼
煙樹碧漠漠遠川平麥老桑空處農忙帶雨耕

棲真庵和前韻

喬燧廩生

野望憑高閣時豐賽社天千家看刈穫萬井見炊煙饒俗
勤耕稼移風待誦絃蕭然秋色裏藉草正堪眠

棲真庵和前韻

梁爾悰侗甫貢士

不謂塵勞內清幽得洞天山川羅白日樓閣杳蒼煙蛩響
依秋砌茶香伴夕絃羽流真隔世羨爾欲高眠

棲真庵和前韻

梁樽曙雲廩生

岸幘逍遙侶隨緣養性天簑披晨出雨鍤荷暮歸煙紫府
繡丹籙清宮奏玉絃笑余塵十丈誰使抱愁眠

張伯始以清虛閣仙跡詩見寄率成一首仍用尤韻

王綬

詩已同崔顥才誰及李侯仙傳玉檢字閣是岳陽樓輿衍

之逸興志 卷之十一
徵書力淳泓與性游便須齊閣筆讓爾獨千秋

西河書院贈劉孝廉豫山

張增慶

粉社知名久平陶始識君宰迎天下士架彙古人文馬帳
存吾道鱣堂樂共羣談經尊卜氏無事羨河汾

和劉思齋先生遊超山八首

張

拱

烏程
宗彝

爽氣生晴谷遙看滿岫花樹深藏鳥語地僻隱人家雲斂
秋光靜風高雁字斜繞欄松影密碧水渡黃沙

其二

好景隨時過秋聲何處來蓼花紅襯石楓葉綠侵杯薄霧

林中起孤鴻塞外回奇遊看不厭一醉任風雷

其三

每愛尋幽勝相邀過幾邨藤蘿盤古木榆柳護禪門翠色
盈花徑輕煙拂竹尊堪嗟名利客碌碌爲誰奔

其四

昔望空林白今登翠欲浮此身原是寄對景且遨遊黛色
晴看秀鐘聲夜聽幽留連情未已不覺月當頭

其五

無心觀逝水仰止在高岑柳蔭流沙碧花香引夢深片霞

籠古殿晴日散遙林極目濃陰際邀朋可共尋

其六

嵐光到處好此地接雲通鳥語侵僧榻天花落梵宮人情
隨地異秋色故鄉同幽賞休辭暮名山在眼中

其七

一帶尋芳處嶇崎不怨難水環危石曲峰聳白雲端竹影
搖窗急波光浸月寒薄遊堪取醉乘興上巔看

其八

最愛秋容澹秋容去復還蕭蕭蟬噪樹欵欵鳥飛山紫翠

斜陽裏蒼黃曉露閒寂寥人跡少惟見水潺潺

秋日謁潔惠侯介之推廟

康乃心

不獨悲寒食清秋廟祀長俗傳貞士節人誦五蛇章報主
卑荀息逃名啟子臧明禋賢哲在並祀狐突卜
子夏田子方縣嶺共蒼

蒼

五言排律

贈李別駕善政排律一十八韻

明董榮陝西

當代循良傳侯當第一人文章冲北斗政蹟著西秦高節
驚僚屬清廉駭鬼神敷施公正道抱負大經綸籌策誰能

伍謀猷孰敢倫四知存震畏一視體堯仁簡訟安強弱平
 徭合富貧移風俱向化易俗盡回淳到處豺狼屏隨車雨
 露均花村犬卧夜榆社戶生春百姓忘愁歎三農樂苦辛
 斯文親骨肉學校重儒紳暫屈黃堂相終登紫閣臣才肩
 商傳說德邁漢平津杜召讓先達龔黃仰後塵催徵下關
 隴會見赴楓宸鵬鷲展垂翅風雲縱蟄鱗蒼生蘇渴望四
 海賴持循

七言律

碧鮮堂

金趙大端
汾州判官

寒陰鑱碎暗僧軒玉立森森翠滿前墜露修梢雲影溼破
 綉春筍綺文鮮雅宜冷映梅溪月尤稱香浮茗竈煙清夜
 沈沈正成寐恍疑飛夢繞淇川

壽聖院古柏詩

金普信
休庵釋

老柏千株不計年滿堂中夜冷生煙不容明月秋幽地欲
 作驚蛇春上天雪後未忘夫子道風前猶記祖師禪曉聞
 寒韻披衣起錯認廬山落澗泉

鳳凰臺

明鞏思問
州判

百尺高崗勢莫齊傳聞鳳鳥古來棲臨風望絕雲霄志對

日空餘燕雀嘯蕭史聲寒臺寂寂楚狂歌遠草萋萋清朝
久備虞廷政應有文明覽德輝

尹吉甫將臺

任良弼吏科給事

周鼎聞說此登臺世遠星移紫霧埋將壘四圍沈鐵馬女
牆三尺老蒼苔殿廊猶憶六軍壯雲樹何年塞雁來一代
中興文武略太原誰識萬邦才

將臺

梁 檟三水令

薄伐遺蹤今尚在于秋感慨繫人思不庭每動三邊燧大
將誰興六月師異代如聞新劍珮荒臺却想舊旌旗聖朝

莫道無張仲輔國謨猷在此時

清虛觀玉皇閣

姚 燧

玉皇高閣倚天開閣上涼風四面來古柏蕭森臨遠漢殘
碑剝落映蒼苔琳宮有地誰堪種閬苑無媒自往迴棟宇
不知何代起宋唐文字半成灰

玉皇閣

梁殿邦元鎮舉人

碧琳宮裏長青苔方外游觀亦壯哉日月近從簷外轉雲
山遙向閣中開龍蛇古柏蒼蒼老環珮仙風颯颯來此日
登臨通帝座凌空却憶謝公才

贈別駕李公和庵先生

劉玉 江西

隴右甘棠接路歧李侯處處有生祠
歌傳廉叔初來日淚墮羊公欲去時
歎歲尙懷鄉土念餘生還付子孫知
承家今有青雲器應播賢聲衛水湄

輓郝節婦

石美玉

痛爾青春失所天兒孤母寡倍悽然
柏舟自誓終無二貞燕同操老更堅
苦節敢言照白日清標端不愧黃泉
誰家新婦能如此中壘何當紀萬年

麓臺山二首

張天斗 忻州中宿

麓臺高出萬峰頭奇癖難消試一遊
遠壑松風憑鶴借千尋石骨爲雲留
芒鞋有分藏春塢芳草無心卧月樓
況是天和晴日好四圍山色映人眸
逕居人外絕塵埃萬壑嵐煙鎖麓臺
有字止宜青鳥送無營時羨白雲來
暖融新綠初生草風送殘香已謝梅
漫道名山甘寂寞春深桃李向人開

再住超山

際得

煙水他方念已消歸來生計記漁樵
牆籬斬草開三徑松石留雲挂一瓢
茅屋焚香翻舊案地鑪添火詠寒宵
逢迎

尚有東林客不使空山頓寂寥

登尹吉甫將臺

康乃心

層臺百尺縣城連吉甫勛名雉堞前
塞草久消征戰壘龍旗却憶出車年
荒祠下馬窺神岳古道逢人說墓田
我亦西京禾黍客時來一誦萬邦篇

吉甫將臺次太乙先生韻

王綬

王師薄伐詎留連鬱律臺高落日前
壁壘唐封疑轉戰旋歸鎬燕幾經年
祠仍代祀知卿土地是他鄉有墓田
大鹵汾流空浩浩憑君一繼穆如篇

尹吉甫墓次前韻

陸豹雯

寂寞郊原蔓草連憑高一嘯將臺前
功成燕喜知歸日地下牛眠不記年
十乘戎車空戰壘千秋廟祀亦荒田
我來想像中興士慷慨長吟六月篇

登吉甫將臺次前韻

陸宣元
蕭山介心

駢駢四牡乘車連鎬雒功垂方召前
王室河山如舊日將臺風雨憶當年
國人歸美師中吉荒塚長留陌上田
千古并南餘斷壘登臨猶記出征篇

超山

陸豹雯

風塵雜踏到雙林寂靜禪關見客心梵景清宵低象緯松
濤白晝起龍吟映階雨上岩黃色出岫雲生澗水音蓬島
欲尋何處是海天吾醉已橫參

謁梁萬戶墓呈康大太乙

劉 頡

大元文物訪平陶繫馬荒墳石象牢綠水長鳴嬰澗細青
山不改麓臺高英雄事業埋蒿里松雪風流見鳳毛

梁墓碑趙

子昂楷書

五百餘年誰呵護好憑金管起人豪

劉思齋遊麓臺山以記見示並錄壁間張中宿先生

詩步原韻即呈太乙思齋

王 綬

麓臺青峭白雲頭杖策高閒羨此遊石起疊峰何處是嬰
常名澗客初留欣看萬壑千岩記幾上城南縣北樓失却

龐公存守黑壁閒題句細凝眸

龐公訪無定說中宿自號守黑山人

清虛觀古柏

雷九章聖宸舉人

鐵枝虬幹拂雲開誰向琳宮福地栽幾度真人餐葉去底
須佛子雨花來秋深只合羣鸞宿雪夜却疑御史回漢武
臺邊堪並老嵩陽歲歲吼風雷

十二景詩

前八景一序後四景各一序

邑志書景八可據者四不可知者亦四可據者麓臺

超峰源池嬰溪也不可
知者仙橋金井鳳臺于
仙也
鳳凰鳴神仙降古今閒
有獨怪前志漫無可稽
既失
年月又乏考証至使奇
蹟嘉祥恍惚磨滅爲可
惜耳
俗傳金井在市樓東南
角下深百尺水色如金
前縣
令黃朗山發工掘之終
不可得仙橋在洪善驛
東北
微存形跡鳳臺在下西
門巋然尙存于仙藥跡
在超
山中不識于賀果何時
何處仙人徒得之想像
而已
予修志姑仍之作八景
詩

麓臺叠翠

王綬

豁天鏤削碧層層象外
高浮自鬱蒸岸幘對人
風肅穆空
青潑地色鮮澄背聯王
屋趨汾渚頂埒橫參逼
玉繩石室
芝房歸便好滿山蒼翠
策枯藤

超峰曉月

嵯峨一望盡琉璃鏡度
雲飛孤嶂移夜氣正添
寒翠色霜
鐘早動老松枝浮生活
劫真憐此水月千山似
洗時欲挾
鷲峰騎象去光明圓映
共牟尼

源池泉湧

水經不注訝天工鬱氣
山川洩此中暗浸海波
源自遠全

浮地軸脈能通鷗猜孤影徐徐下日射重輪晃晃同鑑我
鬚眉尤古澹新莎隄柳共春風

嬰溪晚照

崦曦激射水光燃川聚奇觀幻遠天碧澗紅霞渾不辨青
蒲白石亦爭妍修岡牧豎驅歸犢野寺風鈴答暮蟬更愛
灌侯遺廟古蒙山默默夕曛前

賀蘭仙橋

杖作清風履作雲側欹橋畔水成文丹還大鼎仍遊世鶴
唳中宵却溷羣瀛海藥籃歸絕嶠陶成花氣醉微醺何時

餽到胡麻飯問我神仙骨幾分

市樓金井

鹵沈火舉異難同潛蓄金波養不窮官舍移闌思甄濟故
牆無恙號韓公五行氣正民生遂百尺樓高物象雄愁向
景陽陳瑣事仲宣宅在萬山東

鳳鳥棲臺

城闈突兀鳳棲臺節節何年傍此隈凡鳥從王協律至飛
龍偕子命官來蒼涼彩翼孤雲影寂寞光儀宿草蒺盛世
穎川符上瑞文章應不靳昭回

于仙藥跡

山通百穀草花香採掇應存辟穀方
火棗安生攜海國丹砂葛令貯窮荒
盤紆鳥道懸飛跡鉤注龍潭秘竈房
可許疲癯回大藥不遺名字祝琴堂

清虛仙跡

陸豹雯

太平輿國觀邑勝區也舊有會道俗集後院清虛閣
下一者登閣突有道人年四十許唐巾布袍跣而坐
近中西簷柱清風灑然蓋平生未睹也急趨下呼衆
登視至則寂然無矣坐處柱間遺五字似云一心二

人仁粉土書衆以刀刮之復現者謂觀貌似類世所
畫純陽子嗚呼呂蒲人靈異多著今又降陶耶好事
者爲呂像於上乃復以青飾其字惜哉者端謹質樸
似非妄言者然字跡故在絕亦不類人爲時辛未八
月二十五日未時也予後數年至陶黃冠李本植引
予登閣觀書言之鑿鑿而者亦尙在綴以詩爲新增
景之一

參天古柏鬱千章閣敞仙來菊正黃無漏有情驚小別乘
風驂月故還鄉奇文詰屈煙霞老古貌蕭疏海嶽涼欲駐

朱顏從羽化蓬山長日近扶桑

書院絃歌

誠亭先生廣憲意立義學十區於鄉既又立大小書院二一下東門外一縣治西南邑故有義學在縣治東南先生於西南院則自爲記刊之碑更捐俸延名師劉思齋輩十餘人分教諸生子弟又勸民邨莊更立學加以民間原設之學入其境絃誦遍野蓋陶前此所無也後起者不憚身任之所謂景者固莫大乎是次爲二

颯颯四境讀書聲爲政宜民教與耕黍稷環閣思雨潤範模比屋待陶成宵鐙壁火同藜照問字傳經看負簞化際軒虞應致此慎終如始在賢明

河橋野望

先是惠濟橋成閱二年又環城植柳登橋則青山白水綠樹紅樓遂踞一邑之勝將來萬柳繁蔭東城一帶更當奇絕因次爲景之三非專爲橋柳成於先生也

山明水秀絕纖埃四顧雲天畫作堆殿閣玲瓏空翠接鳧

鷗出沒軟沙開行人歷歷長虹外短笛蕭蕭暮雨來珍重
萬行官柳路待成陰後好登臺

仙觀古柏

仙觀古柏以柏古而似仙故觀卽以爲名在西南十
里胡邨海內駭柏如此者蓋寡登眺坐卧真奇觀也
誠亭先生倡賦於前康太乙先生和於後余亦續小
歌焉太乙曰不列諸景實負茲柏余曰然遂次爲四
而復繫以詩

空青風雨日漫漫側耳江河決未闌象外尋聲波浪寂

中有樹屢螭蟠綸巾羽扇真名士煉骨全神耐老丹惆悵
羊鬚珠不見天齊地等讓高寒

西河書院卽事

王綬

先賢文學古咸英聲振經傳耳自盈飲水方思吳刺史絃
歌快集魯諸生一元道合歸羣性三物賓興絕近名清曠
落成風教在承流未敢誤編氓

七言絕句

贈益公和尚還超山

金王廷筠

平沙漠漠雁翩翩風弄菰蒲水拍天短艇得魚撐月去一

聲漁笛破寒煙

讀壁閒端溪詩有懷

韓邦奇

不見端溪十四載江南塞北日相思郵亭此夜無窮意對
月還看壁上詩

赴大同得樊恕夫書

韓邦奇

別後干戈苦不休一封書到慰鄉愁柳青沙苑春看折何
日同君上白樓

平遙有感

蘇志皋 寒郵

水繞山環古驛樓蜂鬚蝶翅麥花秋歸家未久離家路來

往風塵送客愁

憩清修寺詠松

宋大岳

萬山盤鬱翠煙羅客騎蕭蕭向此過坐愛一松當古剎清
陰秀色滿長柯

次寒村韻

崇教

胡笳傍月聽高樓客鬢蕭蕭已十秋殘夜正憐歸夢好無
端孤枕到閒愁

重過凝碧樓

范道行

雲自西飛水自東桃花柳絮總隨風舊巢燕子知何處煙

雨亭臺似夢中

喜雨

陳以恂邑令揚州

竭誠禱祝方三日甘雨連宵遍野田從此四民皆樂業歲豐盜息是堯天

介推廟

陳以恂

金風颯颯正清秋介廟巍峩偶一遊莫謂高賢骨已燼只今熟食為誰留

署樓曉望

張大成

曉煙初散萬峰低峰外蒼茫入望迷鴻雁數聲雲影去那

知人在太行西

超山卽事

明 瑞相生釋

百杖懸崖一徑幽也無佛法也無求寒山常在天臺寺客到禪門樹點頭

五里莊壁上重書義棠橋詩

愛 玉常山名媛

霧鬢風鬟亂曉妝澹雲孤月影微茫自憐薄命同秋草戎馬鞍頭困海棠

送劉思齋先生遊東山

雷漢章子襄廩生

詩飄筆管戒奚行馬上初看黛色晴何處堪留康樂屐麓

臺萬疊訪題名

登麓臺山

劉 岫

煙樹天邊度幾村青山萬疊麓臺尊
下方城市渾無見一片雲飛出雁門

麓臺山歸

劉 岫

拾得白雲馬上行千山萬壑向孤城
歸來夜半寒窗下猶聽松濤作雨聲

清虛觀仙跡斷句七首

康乃心

賀蘭一去幾時回種藥于公圃尚開
此地真人原有跡山

城莫怪大仙來

古觀清虛老歲華蒼茫柏影似龍蛇
黃冠久住渾閒事只作尋常道士家

玉皇高閣對青山王屋終南指顧間
爲愛煙光聊一憩休疑爛醉岳陽還

素幘蒙頭柱下棲逢人常住說非非
却題半行神仙字劍戟縱橫望欲飛

嵩山老友得新詩伯始作賦陸郎筆陣奇左
共歎遼東華表鶴爲憐海上採藥時

一心若箇二人仁五字華陽秘誥真無限盧生炊裏劫故

園却憶夢中身

家弟仲文曾於吾澹圃夢呂仙

雲遊天下挂詩瓢石上三生匪浪招無奈赤松八萬里祇

應葉縣問王喬

誠亭令尹

弔晉太子耶律妃墓四絕墓在城南二里許俗稱晉

梵王太子妃者可發大噱且謗佛矣詩並正之

康乃心

鏡奩何代掩荒邱瑤瑟玉簫出鳳樓一自故宮人去後年

年煙雨泣深秋

琉璃碧瓦照蒼苔猶似鸞車寶扇開妙麗夫人應有相故

教金粟傍如來

晉國山河一夢移君恩如舊雁鴻知於今墓柏青青在黛

色長留夜月時

一枕千年向此中山邨麥飯冷春風憑他浪說西天話三

月桃花滿院紅

詩餘

次從簡韻

董紹祖

從簡與不肖自宜亭聯轡而來得以款留一日樽

俎談笑相得甚歡王事有程懇懇告去留之不得
餞別於茲坐有索桃源憶故人詞者提筆立就儁
哉偉乎乃繼其韻姑道其會難別易之意云

客懷宛似風前柳暫展眉閒春繖別緒惱人依舊又執臨
岐手
雪梅風調飄零後猶記那人清瘦黃訝故留遲久
誰與同樽酒

寒夜憫戍

絡緯聲殘織翠絲金風剪不斷雁來時夢回緘淚寄征衣
寒早到應怪寄衣遲
心事有誰知黃昏常立盡暗螢飛

秋來無處不生悲情脈脈月轉轆轤西

題超山百福禪院

水龍吟

王綬

嶽崎松嶺參天山腰曲抱叢林秀巖樞洞豁梵儀淵古萬
年靈鷲木落并州雨晴王屋一聲鐘漏緬西來祖意傳鐙
的派還雲窟泉飛竇
金帶笑他索鎮肩香關衲殘人瘦
寒花供養幽禽呼喚禪心泯臭老我紅塵夢迴清景素蟾
輪驟到幾時擺脫名韉利鎖與超峰壽

春暮同劉思齋宿超山僧舍

花發沁園春

陸豹雯

東接太行西來汾水超山翠黛重疊春風解愠遲日融和
到處冶花嫩葉山光潭影盡收拾眼前眉睫臨古寺清閒
寂歷頓忘裘馬臣妾 回首黃昏清籟正雲澹星羅一輪
明月經聲朗誦梵韻幽揚却悟前生慧業僧房穩卧想萬
感同歸浩劫堪取哂蓋世文章五陵誰是豪俠

詩補遺

迎

鑾詩九首

并序

汾州沈 宵 誠齋 太守石門

皇上御極四十有二年時維十月

命駕西巡蓋欲覽山川之形勝運天下于指掌固不僅觀

風問俗而已也

臣宵

幸叨

特簡未報涓埃茲者恭迎

聖駕竊見

鑾輅來臨處處焚香夾道

天顏有喜人人念佛同聲既已慶快一時且願扳留數日

此誠我

皇上恩如天地德同堯舜所以淪肌浹髓不覺其踴躍歡

忭如此

臣宵

自愧巴音竊擬華祝恭進迎

鑾曲九首伏惟

聖明賜覽

臣竊

幸甚

鑾輿自晉幸秦中萬姓歡迎到處同共覩

天顏真咫尺堯眉八彩舜重瞳

河山表裏晉興圖舊是唐虞夏禹都誰道民風不如

古于今歌頌徧康衢

虞書特紀時巡典禹貢兼言物土宜

聖主省方還問俗民間何事不深知

堯天並育萬方民三晉先邀

翠輦巡地湧甘泉勝玉醴花飛瑞雪應陽春

清風習習不飛埃雪後千山黛色開白馬朱纓黃扯

手百神呵護

九重來

綸音宣諭萬民看減從輕裝亦不難行李無勞供匱乏大

官自有

御廚餐

鑾輅龍旂豹尾鎗巍巍

萬乘在中央兒童婦女休迴避葭屋咸瞻日月光

仰觀

天服真慈眼其曉

皇心卽佛心萬口同聲齊念誦現身帝釋是

當今

文德誕敷四海外

武功超軼百王前小臣叨列嵩呼末

聖壽無疆祝

萬年

大駕西巡恭紀二十四韻

邑王

綬誠亭
皋蘭

玉律千循癸金烏令次房鳴條千樹靜穫稻萬困藏
惻惻軒虞治悠悠秦晉疆民依軫赤縣清問及黃堂
從滅虎賁旅旌飛鵲廟岡翠華天外落羽葆月中翔
命倌芟繁禮清宮止具牆茅茨存儉德澣濯識垂裳
封禪卑秦漢倫安陋宋唐絲綸寒谷暖飲食野人嘗
宣意羣工肅摠誠百辟良蚪蜩窺

聖藻冰蘂厲官常愛日親童叟重門洞甸荒家傳三祝册
戶叶九韶章分職慙巖邑求芻愧牧坊壯如過曲逆
花未徧河陽躑躅鴛駘力勤思富教方但虞譏負乘

焉敢事亡羊爛熳星雲麗晶熒川嶽光流芬綵愷澤
大舖醉霞觴巡狩超前古仁風播奉揚東西皆我闥
南朔更誰鄉盡體倦倦隱潛符默默蒼小臣惟敬勝
無逸式吾

皇

柏仙觀古柏歌和王令誠亭詩用杜工部古柏行韻

平邑爲古陶地麓臺峙其東古柏在胡邨古觀中與麓臺相近一本五枝枝各異態蒼皮黛色宛然工部詩中景也其西枝墜地以石柱擎之石入相尺餘按柱離地如龍探爪之狀斯亦奇矣

沈 宵

柏仙觀中有古柏西枝欲墜柱以石勢若虬龍怒探爪拔
柱離地幾盈尺崎嶇自與古爲徒倔彊不受俗憐惜秀色
每來雲氣紫勁骨偏傲霜華白昂霄聳壑陶城東翠靄橫
鋪數畝宮偃仰屈伸各異態晦明陰雨欲騰空車蓋童童
蔽日影笙鏞謾謾和松風不夭斧斤有天幸莫知端倪非
人功挺然可作擎天棟唐歟漢歟世所重蒼茫定有鬼神
護瀟灑幾經歲月送吁嗟乎桐封密邇君剖圭錦製餘閒
文吐鳳寄聲柏與人兮各自愛天生爾材必有用

西河書院感興用文公白鹿洞韻

讀書有精舍如穫必築塲時習生喜意如織自成章鹿洞
與鵝湖闕世幾弛張不謂巖邑中東壁分餘光屋宇雖無
多誦聲何洋洋諸生半在門少長集同堂質疑庶起予懷
古慨以慷西河復見今後來詎可忘

柏仙觀古柏歌用杜工部古柏行韻

汾州
別駕黃大蘇
逸湄
無錫

昔日少陵歌古柏古柏長篇勒金石自愧材與樗櫟同仰
視古人懸丈尺雙眼忽覩此侷奇却立徘徊惟歎惜虬龍
天矯雲氣青猛虎叫嘯日色白麓臺突兀峙其東蒼顏黛

色凌僊宮柱石撐撐千年久拔地奮起行虛空科頭宴坐
日西落耳畔謾謾來清風老榦槎枒何變幻恍疑鬼斧與
神功匠石一顧任樛棟聲價屹如邱山重傲骨不受風雨
侵奇姿屢經日月送君不見桃李無言自成蹊竹梧有節
終棲鳳才老空山鱗爪張柏兮柏兮成大用

西河書院感興用文公白鹿洞韻

簿書畏微逐所喜翰墨塲得失在寸心千載惟文章藝苑
日荒蕪儒術幾紛張作宰賴大賢文教自輝光講院集生
徒士氣何洋洋尚論資誦讀百世如同堂親炙誠淵源聞

風亦慨慷還期勵名節曷哉毋相忘

送張劭之平遙

字博山嘉興人

朱彝尊

彼汾沮洳吾舊遊送爾匹馬逾徐溝人行芳草碧於水日
出杏花紅滿樓榭中酒味苦桑落簾外鳥聲黃粟留客居
適意遠亦得搖筆賦詩何所求

詩續編

堯廟

雷仁育

汾渭

神堯功峻極廟貌鬱蒼蒼曠矣天無外遐哉澤未忘依階
懷古澹入殿想洪荒於穆陶唐境城隅有鳳翔

庚辰春仲旋凱過棲真庵贈楚珍仙師

筠庭 特通額

雲隱棲真處深藏自在天掩關常避俗懸榻待多緣雨細
琴書潤風清草木鮮我來到別墅心思頓澄然

九日過棲真庵四首

李由中

樵溪 邑令

作意去尋秋招呼野飲幽分曹穿綠樹連騎渡溪流風響
清砧院煙橫玉笛樓予懷同菊澹搖落不須愁

其二

紺宇傳仙梵青苔覆女牆幽居鳧鳥下
令節籜冠忙客韻

平遙縣志 卷之十一
依楸局臺高古夕陽沈檀煙過處偏愛稻花香

其三

自有煙霞癖兼之節候移青山成獨注碧草任颺吹社鼓
邨邨動行雲故故遲彌天秋色好深負桂花期

其四

松院科頭坐繩床抱膝哦共傾春酒熟誰問塞鴻過餘靄
明衰草歸鞭折細柯淒風傳空外城上角聲多

清虛閣

初傳仙跡後閣被回
祿跡無存有感而作

雷仁育

翠閣麗清虛岩堯跨廣漠過客肆流覽登臨豁遠目縹緲

真人駐軒翥留仙跡歛然駭聽聞觀者如堵塞不解仙靈
意摩挲惟嘆息無何大火熾劫灰存片刻我來訪仙踪杳
杳何從覓天上有玉樓斯閣堪匹敵霏微度九霄颺搖依
帝闕本是琳宮秘塵寰那許植咄嗟往事遷移在倏忽
逝者類如斯滄桑變非一我味真人言恍惚如夢覺

紫蓋峰

以下八首係超山八景

劉

釗

勉亭廩生

宛是函關彩飛來映碧峰半圭疑豎蓋一柱異從龍漢鼎
藍堆杳卿雲壁立濃嘉祥通紫極郁郁罩芙蓉

萬松嶺

峭拔凌天際屏圍萬樹松排巖君子操合嶂大夫封濤送
風聲急光迎日色重廬山駢塵尾此嶺更葱龍

文殊頂

雖非靈鷲地歇腳紀文殊絕頂停飛錫湍流洗覆孟青山
全巉嶮白足半跏趺嶺閣今何在猶傳不二圖

清光峰

百丈峰巒秀清瑩疊放光依稀冰鏡照彷彿燭龍藏樹密
銀花鎖巖深玉色彰登臨奚着屐螺髻自輝煌

觀音坪

大士居南海崇岡亦著名疑來觀月曉應是愛松榮紫竹
崖無影白鸚嶂若鳴尋聲須救苦甘露灑山坪

寶塔巖

浮圖何所寶紫氣繞層巖色映風鈴靜光搖石壁巉玲瓏
藏舍利突兀隔塵凡天半朱霞起斜陽遠嶺銜

應潤泉

半嶺龍祠裏瓊瑤漱石泉練垂青嶂秀珠濺綠苔鮮濟旱
行雷雨開流吐霧煙虎頭無待置應禱澤桑田

百福井

古寺藏深山何年鑿浪井寒泉澄月華碧登漾峰冷雨祀
垂晨鉢病瘳汲暮縵非同金鳥巢百福著幽境

夏過棲真庵次陸韻

郝

康

康侯舉人

步城數里外憩足聞風天日色消暄暑松梢吐冷煙解衣
敘舊話促膝聽新絃堪羨黃冠士白雲深處眠

鳳凰臺

雷河清

瑞徵貢生

鳳鳥雲儀處巋然見古臺蒼茫侵碧落突兀傍城隈羽憶
當年集桐傳舊尹裁文明今有象翹望九苞來

修建龍神祠落成敬題

德

貴

培公邑令

帝德資靈貺神功沛澤奇五方胥託命萬寶仰膏滋詎敢
忘神造勤將楹桷治巍巍輪奐發肅肅斗珠垂旌旆飛雲
殿冕旒動玉儀升香昭合漠嘉醴並祥粢配享隨班位明
禋各具宜秋成勤報賽百蜡無愆期里社尙敦樸祈年會
有時自茲適所願歲稔復何疑保赤酬清問幽明欲共之
蒼生霖雨潤禹甸永清夷

雲社

郭興讓

大雲垂五色西望覆桐封藹藹春多態亭亭夏作峰卷舒
通意氣開闔盪心胸日暮依江表崇朝起岱宗寰中呈麗

彩天際想丰容隨意為來往無心任澹濃自然生變化何
用就陶鎔興雨期如注培風好趁冬仰披樂令範高躡馬
卿蹤平地驚雷日天池躍八龍

書院絃歌

冀步雲 奮亭 諸生

盛世崇文治絃歌續古風三餘勤誦讀午夜亟研窮繼晷
宵鐙永談經俗慮空琴音流院宇書韻徹西東地接汾河
勝師承卜嶺宗幸參諸子列學道有深衷

中秋遊超山聯句

樂平進士趙珮玉鳴襄陵孝廉張挺立庵太原孝廉趙謙德守亭副貢石煥理齋

偶從塵外遊遂宿山中閣 玉鳴 虛窗萬壑迎來嶺爭迴合 庵立

雲峰忽有無神物自吐納 亭守 日夕響松濤飛泉互相答 理齋

境曠夢亦清况有月同榻 玉鳴 月移林影空花亂鳥聲雜 庵立

披衣陟層巔命僕提壺榼 亭守 載飲且行歌已造摩霄塔 理齋

天風吹客裾鴈字飛相逐 玉鳴 言瞻過去峰但覺雲重沓 庵立

絕頂望無垠洞啟乾坤闕 亭守 豁然萬象開倏爾煙林閣 理齋

混闢竟何窮回頭問老袖 玉鳴

帝堯廟

劉興樸 稷生 監生

古帝初封處巍巍廟貌存花城千萬載允矣百王尊

鳳凰臺歌

雷仁育

鳳凰臺上鳳凰棲異彩祥輝照日迷
翹翹儀從阿閣降鏘鏘韻與六英齊
迴翔熠燿丹山瑞瞻眺騰騫帝子蹊
西接粉樓跨百雉東迎紫氣護千隄
斯臺軒豁從龍起閃爍朱華漾碧璃
搖曳龍光通玉闕斜暉掩映麓山谿
谿回峰轉橫香霧鸞翥雛翔繞絳霓
緬想歲蕤桐翳處歸昌曲奏五雲低
依稀千舞麟遊世彷彿衢歌擊壤黎
千載貞元逢道泰朝陽欣見萃萋萋

書院聽絃歌志喜

德貴

桃李成行柳綫垂絃歌拂拂沁人思
宛諧籥舞敷清化恍引薰風奏帝墀
四際雲山開寶曆一天疏翠擁玻璃
優游書圃饒奇悟應觸文心漾碧池

將臺懷古

朱宗元

邑諭

一望平臺落日中當年曾此駐元戎
貔貅簇擁兵戈肅鳥雀喧呼壁壘空
斷碣古苔零夜雨頽垣衰草動秋風
膚功不與滄桑改六月雄圖歌未窮

再過棲真庵

郝庚

牆陰柳拂蘊奇幽隨伴重來追昔遊
風景猶思肄業日襟

平遙縣志 卷之十一
懷別想蓬萊州桂花馥馥青雲遶柏影森森紫霧浮更樂
羣仙接膝飲便占秋色起龍頭

西河書院四時勉學詠

薛登五

逢年優貢

春光先到綠溪隈藝圃尋芳逸興催煙柳鶯歌搖彩筆菱
波魚躍映花臺紛綸詩思瑤林發滂沛文心碧鑑開漫道
盈門桃浪起竊從時雨悟方來

溪邊夏景好吟哦挹得薰風趣若何修竹韻和書閣起絳
荷香撲水亭過開窗豁目鎔經史永日寬懷任嘯歌高臥
羲軒情不盡瑤琴一曲暑消多

爽氣秋來羨古篇同人蕭灑讀書天輪開桂蕊揚清照籬
獻黃花鬪晚妍綠樹蟬鳴吟好韻碧紗螢映賞瑤編談經
更領幽閒趣萬里澄鮮湛滿川

三冬瑞彩散天涯坐對芸牕望影斜宿火鑪明宜載酒敲
冰河泮用煎茶漫嫌白晝催豪興好向青藜吐鬱華遙想
程門多立雪羣才聊伴詠梅花

弔晉太子耶律妃墓

朱穎

一自傾頽天姥峰曉妝鸞鏡失花容吳門舞鶴空惆悵原
上長留馬鬣封

宿草年年泣露痕紅顏長此謝君恩少翁果有神仙術不
爲夫人一返魂

紫玉真成一縷煙不歸西土不歸天香魂夜渡桃花水雨

雨風風泣杜鵑

山自青青水自流白楊斜裊土饅頭一聲牧笛殘陽裏吹
出人間無限愁

郝烈女

劉釗

受聘芳春與郎未親顏面痛喪兩髦向靈堂致奠繡閣泣
血欲共黃泉覷眄關雎莫咏羅帕生變紅粉香銷青史

中別立傳道及冰節又誰人不羨遠駕柏舟那計後稱名
媛碧霞深處望之如見

趙山秋夜

蘭陵王

毋爾信

一痕碧澹寫斜天秋色問當年是那個剖開混沌滔滔不
停息疏星沈碎石流浸寒蟾躍出看兩岸水帶霞衣帝女
經綸手新織漢槎著奇蹟誰跌轉星辰來此寄迹九霄
好作煙波客待持杆遠隱雲深難覓逍遙垂釣樂無極金
鉤借初魄幽閨最堪適有斗笠參瓢霓裳霧幘清風爲
我吹長笛聽老龍吟罷浪平聲寂人生如夢忽閃眼東方

白

烈女郝氏輓歌

冀陳器 守先
貢生

堯封風教如天普

興朝運會擬隆古清波洋溢閨壺中節烈高昂出蓬戶郝
姓有女罕其貞端方靜一從難覩許字未及桃夭期紅顏
殉節義堪取玉骨冰姿不自惜路人歎息泣如雨韶華再
醮習為常對此冰霜安足數吾聞杞殖曾善哭又聞柏舟
誓良苦夫亡猶稱未亡人從亡不似茲娟武吁嗟烈烈芳
魂昭古今妻道千秋應不腐

平遙九日

折遇蘭 霽山

蕭條九日花仍發砧杵孤城雁未來木落山川還作客秋
深風雨罷登臺秋多不辨茱萸佩吟苦頻斟沆瀣杯兄弟
家園相憶否暮雲遙隔亂峰堆

三吟鳴鳳書院七絕四首

折遇蘭 霽山

其一

風和日煖暮春天結伴周行郭外田麥浪初翻青野露柳
眉一掃斷林煙

其二

後先連步快登樓表裏山河一望收汾水幾曾散北海泰山直欲跨中州

其三

辟卻風塵五里遙坐來俗慮覺全消案堆尼父傳薪集壁掛顏淵飲水瓢

其四

同人莫笑我吟詩已到書齋向晚時充腹連番頻暖酒蕘腸幾度捻微髭

門人喬明經

松岩

邀遊冀氏小園偕李廣文

徽五

盤

桓至夜乃歸詩以記之

即三吟鳴鳳書院

徐繼畲

松龕

性本樂山林城居苦促局塵氛兼行潦車馬紛相逐春事已將闌猶未睹新綠萬紫與千紅夢想勞心目杖策竟何之
裊裊徒仰屋喬子吾門彥開講城之麓居停有小園其內繁花木邀我往一遊云可醫吾俗欣然投袂起代步有輪軸入門扶杖行清冷如入浴園約三畝餘花樹縱橫簇桃杏已凋殘白楂正芳馥丁香紫白分壽丹黃似菊桃梅逗嫣紅玫瑰香猶蓄藤蔓鬱虬龍枸杞雙蟠曲餘樹不知名枝幹或已禿平地草如茵馬蘭兼苜蓿又有諸葛菜採

之不盈，翬環坐小亭中。天籟生空谷，啜茗當春風。蕭然遠
塵濁，西南有魚池。冀可濯吾足，頽涸已多年。清波無一掬，
東北有高臺。云可拱遠矚，扶掖強一登。曠野鋪芳繹，遊罷
進晚餐。斗酒歡相屬，先生饌已豐。誰謂食無肉，劇談久忘
倦。黃昏繼以燭，廣文風雅士。精神常滿腹，買鄰得僧珍。學者
與書院相鄰茶話屢更僕，同遊適我願。頓拋愁萬斛，慨念時事
艱。兵戈填九服，擾擾著黃巾。紛紛逐秦鹿，皇天佑有商。中
興一何速，封豕及鯨鯢。次第都殲戮，吳越旣澄清。三秦皆
克復，北地剩遊魂。鞭箠堪管朴，旣欣年歲豐。况值邨醪熟，

太平有遺老，茲遊當再續。

平遙縣志卷之十二

雜錄志

古立稗官凡巷議街談皆得採入亦芻蕘不棄之意也漢書載小說者流至十五家而志怪齊諧流傳不廢自元明以迄我

朝滄海桑田幾經變易而其間天時之災祥兵劫之類仍年歲之豐歉風俗之奢儉筆諸記載可補正史之闕他若金人王母自漢以來海內崇信已久傳燈真誥書遍天下則二氏之說不能廢也以及泉林逸士

廊廟鉅公逸聞軼事可資考證茲故廣爲訪察附記於此以告來者爰志雜錄一卷終其事焉

災祥

元

大德七年八月六日夜地震縣人死者三千六百三十名口傷者四千三百九十名口頭畜死者五百二十房屋倒塌二萬四千六百間公廨倒塌殆盡地湧黑沙與水不止是時乏食之家計一萬三百五十口

明

嘉靖二十一年北兵大舉南掠被擄殺不可數紀

嘉靖三十五年大水本縣溺死七千餘人

嘉靖三十六年酷旱缺食之家三千八百有奇朝廷降寶鈔三千八百錠以賑濟之有百姓過房子女者官爲給錢贖還嗚呼災傷天數也賑貸君恩也因書之於戒石之陰以示來世蓋舊志所載如此

嘉靖三十六年十二月十二日夜地震其聲如雷地裂

湧泉陝西及蒲州等處尤甚壓死人畜不可勝紀

隆慶元年北兵攻陷石州移兵平遙多被殺掠

萬曆十四年正月旱至七月五穀未種秋後方雨民有
因之種麥者一冬無雪又旱至次年五月麥田盡槁
二歲間饒積之家僅可餬口餘有朝出而夕死者有
就塗屍割肉而食者其轉溝壑散四方不可以數計
聞之者惻然

萬曆三十二年城北汾水泛漲徑入沙河夏秋二禾盡
沒農家失望

萬曆三十四年西北鄉冰雹大傷鄰河多愁歎之聲

萬曆三十八年大旱一粒不收餓莩載道

萬曆四十一年大水漂沒田苗房屋極多溺死者甚衆

萬曆四十三年九月二十日戌時地震塌倒房屋數百
餘間

萬曆四十六年四月二十六日辰時地震屋瓦皆動有
聲城垣塌倒數處是夜又震

萬曆四十七年大水漂沒麥田房屋甚多

崇禎十三年春米斗四錢麥斗三錢

崇禎十四年五月至九月大水米一斗四錢麥一斗三
錢

崇禎十七年闖寇過縣男女盡避山寨止留空城

國朝

順治九年至十一年大水泛濫沿河禾稼湮沒殆盡

康熙十八年七月二十八日地震

康熙二十二年十月初五日申時地震甚急房屋多壞

閒有傷人

康熙三十年五月初一日午時忽從正東黃沙湧天須

臾轉正北少頃遍天至酉戌時方止是年蝗蟲爲災

邑大荒平陽安邑夏縣等處更甚

康熙三十二年二月十七日午時有雲一片其色不一

旋有大水淹民房屋多壞

康熙三十四年四月初六日酉時地震甚急有聲如萬

馬奔騰房屋多壞平陽各處尤甚

康熙三十六年米斗五錢麥斗四錢

康熙四十二年五月蚱蚋食麥穀黍苗近城堡爲尤甚

縣令王綬率僚屬祭之蚱蚋初起甚盛遍地如織及

祭後竟不食苗俱一一上路或走集閒埠下在田苗

者悉去土人相傳以爲蚱蚋之生每祭必應蓋蜡神

之靈也

康熙四十二年仁莊諸村水災民困甚縣令王綬履畝踏勘錢糧俱爲緩征至於耗羨一概全免任民隨便輸納仍於被害之家借給穀石牛種籽粒民始有起色

康熙四十四年正月十三日夜二更天鼓鳴

論曰古人稱反風滅火蝗不爲災或以爲粉飾吏治傳說之詞耳以今視昔何其不爽也鄭子產謂天道遠人道邇夫人道旣邇則天道亦豈遂遠哉八蜡之

祀自神農出畷如百穀防庸郵表畷田猫田虎昆蟲皆有神明以黜司之故祭則受福每如影響是易所云精氣爲物傳所云聰明正直而壹者帝王之刑賞民生之休戚鬼神之情狀於是乎出蓋昭然耳目若日星然而或者以故事應之且謂祭無益則其不智不仁爲已甚矣故論著其實以告人牧焉
災祥補遺

皇統閒城遭大兵援旅五千編戶數百餘家盡爲屠殺骸骨縱橫暴野如莽李公洵仁與子致堯哀而瘞之

有文刻清虛觀中

災祥續編

康熙六十一年秋旱斗米價至九錢有零

雍正元年大稔

三年四年秋禾皆稔民無饑色

五年河浸三里

乾隆三年十一月地震其聲如雷屋多損壞

四年彗星見於西方經月乃滅

九年秋天鼓鳴聲如疾雷

十一年夏旱

二十三年六月初十日酉時雨雹大如拳或如卵約有尺餘

二十四年二月至六月無雨斗米至八錢有零多受餓腫足而死者

二十五年正月元旦日月合璧秋石家坡山移數丈

二十六年六月汾水西堰決七月東堰決沿河一帶

邨民多受水害

三十二年七月汾水大漲官地邨水深丈餘男女棲

身無所宋璨宋琅兄弟作筏拯救月餘水退方各歸
縣令德貴每一間房給銀五錢賑之

三十三年八月二十日雨雹大如鵝卵

三十四年七月長星見於參井之間光長二丈餘至
九月盡方滅是歲秋禾薄收縣令德貴設法煮賑自
十月起至次年二月止貧民獲安

咸豐三年八月粵匪竄至平陽城鄉居民奔走四匿至
中秋節幾至一空幸救兵已至趙城札營四道橋人
心始定

四年七月大雨七日

六年二月初九日大風晝晦三日

八年八月彗星見於西北兩月餘滅

九年六月城隍廟火不一時俱成灰燼

十年大旱秋苗未秀

十一年正月五日雨土六月蚩尤旗見月餘滅八月
初一日卯時日月合璧五星聯珠

同治元年二月初三日暈旁有珥七月十五日黃昏後
流星如雨向西南幾二更止是秋汾水大發東北鄉

禾稼淹壞房屋倒塌長壽尤甚

二年三月太白經天四月初一日日赤無光至初八日止

三年十一月初四日汾州合屬大雪三尺

四年七月東北鄉大水長壽鎮尤甚壞民居二千有餘

五年七月十四至十八日晝夜大雨惠濟橋隄決北門外大水

六年七月十五日巳時天鼓鳴東北

十年八月西北鄉大水

光緒三四年連歲大稜顆粒不收城鄉男女死傷十餘萬而逃荒在外者尙不計其數真從來未有之災也
五年八月惠濟橋隄決水盡奔東小官道北門外水深數尺房屋湮沒殆盡幸城濠橋高捍衛城垣不至損壞

事考

帝堯始封

堯母陳氏名慶都高辛丁亥生堯於丹陵卽今北直望

都縣縣治東有堯母陵極高大旁有廟祀之帝年十三佐摯封植封於陶年十五改封唐年十八爲天子號曰陶唐氏蓋不忘其始封之國陶先唐後也唐爲太原陶爲平遙相去百七十里

南神廟塚

南神廟俗稱光明菩薩至傳爲晉淨梵王悉達太子之妃耶律夫人者極爲俚鄙難通廟中有塚砌以琉璃古柏蒼老離奇大至三抱似非泛然人傳塚舊開類穴居狀住持於晨夕焚香其中一日入則見一麗人

凝坐梳髮大驚而出遂封砌焉夫耶律遼姓也晉封爵也淨梵何來得以相涉且何從葬此其名晉太子妃者蓋晉國太子之妃耶律氏耳碑記無存香火雜踏此邦之人呼佛爲太子寺卽稱太子寺故遂相混爲一而復冠之以晉村婦野叟白蓮無爲燒香聚會浪語不知訛自何年亦不足道夫人有知當一祭齒矣世無登善誰感清娛於夢中者

妃墓作方制頂如卓蓋見之肅然敬畏四壁盡用琉璃若王府蕭牆老柏歲久成雲霞狀是千年物當在

金遼五代閒殿祀佛母佛妃極有倫理不苟蓋妃墓之香火院也年遠湮沒無韓陵一片寒食賽會反以佛母乞靈不知爲妃矣

純陽仙筆

康熙辛未八月二十五日未時清虛觀道俗會集皆坐前殿或廊下適有太原刻字數人來遊登玉皇閣見一道者坐閣上西柱下着白幘布袍年可四十許刻者不知進問之云此觀中常住師否道者曰非是非是伊在前邊刻人下樓至前述之道官李本植與諸

耆老咸驚曰閣上從無人過急走觀之已無蹤矣所坐柱上留書五字極蒼峭爲一心二人仁絕不似人世所爲而略帶草意神氣極雄於今依然如故人以其狀類俗所畫純陽遂以爲呂公來此因肖其像於閣上觀中古柏成林蒼然如黛層閣在雲表登之令人有冲舉意其地古多真人城市煙霞宜仙真之所遊息也

趙松雪書


文敏書古今至寶所書梁廉訪公墳前大碑在梁官邨

五百年埋沒荒邱無人知者自康熙丙戌修邑志因
 觀梁氏家譜始得之筆鋒瘦硬清妍別為一種跡純
 陽宮二石不相上下其五路萬戶李集賢倜書亦楷
 法絕倫皆元人名筆

黃花老人詩

益公和尚遠遊還鄉王學士子瑞贈之以詩邑西源老
 人李子益晉稱其詞翰鏗鏘煥爛為一時難得之寶
 而公能得之公之行業為人不言可見矣子瑞即金
 翰林修撰廷筠所云黃花老人也

道器圖說



易曰形而上者謂之道形而下者謂之器先儒曰道卽理也言乎其體者也謂道卽理而氣或非形而上之道歟沈伯咸曰道也者合理氣而言者也故有動靜無內外有精粗無險易有清濁無狂聖故理也者道之體氣也者道之用曰和曰費用其廣矣曰中曰隱體其昭矣先儒有曰道卽理者是有體而無用則氣之在天人也有時出於理之外及墮于器之中離理而非道矣嗚呼理氣離道器淆形形之妙晦由執之陳言而弗求之吾心也今夫元亨利貞道之理也體

也春夏秋冬道之氣也用也仁義禮智道之理也體也喜怒哀樂道之氣也用也道之形於上者也若五行五倫爲人物之本體勾者角者羽者鬣者耳目鼻口者爲人物之支體器之形於下者也形而上者妙於體而不窮故曰道形而下者拘於用而有象故曰器體則無不善矣用則或淆于習焉故狂克念爲善反者之功而聖同歸矣故合道器而理氣質分理氣而體用形體用形而動靜殊動靜殊而精粗定精粗定而清濁分清濁分而性命凝故理一而氣二也原

其初無內外無險易無狂聖道一而已易曰一陰一陽之謂道道也者合理氣而言者也明嘉靖十三年十月朔日平遙縣令定興陳讜刊石

賢令尹

涇陽張公強毅清峭實心愛民民至今感誦之滿洲過者往時勒折車夫箠楚需索民不堪命公力爲禁絕高淳王公以戊辰進士起家仁厚慈良而性殊嚴不可犯一日滿洲大人過其部下殘暴尤甚至刀刺工掾之手公大怒不冠而升堂喝令縛撻滿洲人尙恃

主勢曰撻不得公曰板不可棍不可乎呼令衆持撻至曰勿卹其死有令在擊之幾絕立具文申報主者大懼叩頭請免立罪詞而去人謂爲張不易而爲王尤難

疏通糴糶文

天災流行國家代有秦晉密邇故糴路得通穆公汎舟之役自雍及絳相繼是也康熙四十三四年連歲薄收糴糶艱難民食不給邑令王綬詳請當道爲民食攸關亟請疏通糴糶以重民生以廣

皇仁幾六百餘言嗣蒙撫憲噶公行司移咨秦省督撫得
放出關糧船二百一十隻其文有云竊惟雨暘寒燠
天時不無豐歉之殊肥瘠盈虛地道亦有高下之別
所貴斟酌調劑動合時宜以有餘補不足以貿遷通
有無庶盈歉消息不足虞荒稔疢癘氓其患也伏思
康熙四十二年十一月內荷蒙

聖駕西巡軫念民艱卹西北之黔黎覽秦晉之形勝深切
惠下之仁獨詳備荒之政

恩詔豫省三年之內截留漕米六十萬石貯之陝州爲秦

晉適中之地豫防災稔

皇恩浩蕩愛養元元何有加無已至此極也乃者復蒙憲
慈體恤民瘼力敷

皇仁捐俸造船由汾達黃以通輪輓憂國憂民可謂至矣
但公家之籌畫極盡焦勞而百姓之貿易亦原不竭
欲使在官在民相濟而成盛舉揆之時宜所有一得
之愚不敢不以之上陳也卑職西秦陋士冀北微員
豈有碩畫足當採擇然耳目所經實難緘默以蹈隱
蔽之愆憶自癸酉至今已一十有三載矣竊見關中

米麥每兩則三四石有餘晉中價值每兩則四五斗而不足即食物蔬菜等項亦不啻倍蓰之不同夫密邇鄰封何其低昂不一貴賤頓殊大相徑庭若是哉揆厥由來皆由關中之地肥饒黃壤宜麥宜穀故收數豐盈且陝地甚廣延鳳平慶耕者所獲皆轉糶於西安雖壬申偶荒而元氣旋復原不可與他省一槩論也乃秦中之議者謂救荒莫若遏糶懲壬申之偶荒迄今十餘年來歷任當事舉皆嚴飭地方各官於要津處所密加防護不許民間一合一粒得渡河而

東以致陳陳相因粒米狼戾貧民賣一石之粟不足上供數畝之糧此秦民粟荒之嘆傳之道路而共知者至於晉地黑壤多宜植秫粗而糲不可以食於是民間不得不以歲收所入燒造爲酒變易銀錢或遠至直屬西至秦中四外發販稍得潤餘上完錢糧下資日用雖奉檄禁止燒鍋究無益於實濟蓋自古風俗土宜使然雖法令不能止也况斗秫甚賤造成燒酒除去費用斗秫可易斗粟故歷溯從前以種秫之晉民而不憂困乏以無閉之糶者故有無得以相通

耳再查江浙楚省地處天南災眚流行亦所時有然米價不至騰湧貧民不至失所彼固恃有巨商大賈通行舟楫千艘萬舳裝載發販挹彼注茲週流無滯故得價值平坦不惟興利兼可救荒豈如十餘年來秦閉晉糴之故習竟遵同

功令永爲厲禁乎致使血脈不能流通有無不能相易晉之炭鐵棗酒及諸土產之物車推舟載日販于秦秦之合粟不入于晉卽以憲台照臨三晉數載以來勤宣德意遍布恩膏感召天和連登豐稔而米價食

物終不能賤如關內豈尙有游惰之民不耕之地哉夫亦生穀有限出產無多向來轉輸之地閉塞不通平陽一郡不能實以西安之糧米則汾州太原亦安所望其接濟哉恐當四海一家之世不宜接壤鄰省阻絕如此夫秦晉之區如唇倚齒由汾而黃而涇渭及今新造船隻現通舟楫致粟之易莫過於此而尙與之以絕塞屏阻又何論夫太行以東歷險而後至者乎故卑職以爲欲平秦晉之粟價當先通秦晉之輓輸誠能弛其禁令寬其糴糶以秦粟之有餘流通

晉地之不足亦以晉民之粟價易爲秦民之輸將不
特爲晉計且爲秦計也如果芻蕘可採伏乞憲臺移
咨秦省疏通民食俾民間糴粟船隻由渭入黃永無
厲禁仍復宣示憲仁俾晉民悉知移咨疏通之故照
舊貿易將大河以東億萬生靈生生世世永沐鴻慈
於無既矣

麓超二山

麓臺無樹山巔王浚廟旁止松三株其山荒大無比以
高勝超山地勢幽秀峰迴路轉溪流映帶林壑極美

然別山無樹而此地獨盛寺前高嶺青青如黛風雨
陰晴撲人眉宇時作濤聲是以松勝也

武貴

宋金元之間此邦號爲極盛英材崛起如李帥彥哲梁
五路安定杜沁帥父子兄弟祖孫爵列公侯冠蓋節
鉞勳名爛然一時鼎立起家率多武貴或亦山高水
長地氣使然非偶也

著述之家

自古以來著述之家或不乏人世遠年湮無從摭考金

於元而後名儒接踵如杜公敬甫一代名臣受業於魯齋許先生之門謚曰文定其生平在朝在野論道經邦必有典冊高文而傳者寥寥止於家譜中得碑記二篇皆卓然大雅舊傳其樺陽十景詩爲元大夫吉所品題與後裔所錄繼善堂題詠今並一字無存至宋如任太史兄弟甲科高行亦不得遺文表見而梁孝廉麓臺先生元鎮奇才異筆上下數百年間氣所鍾當是文西極左文信一種碑版所留亦二三而已訪之其家則以兵火後盡矣後有作者仰止高山景

行在望上下千百年黽勉從之如在几席慎勿謂此國無人也

事考續編

汾水疏濬考

自汾水徙入平遙境享其利者半被其害者亦半光緒四年九月連朝陰雨河道淤塞兩岸二十餘郝盡成澤國房屋田禾湮沒殆半濱河居民不堪其苦邑宰汪公親身履勘建疏濬議自蔣家堡起至左家堡止計長十五里許河心挖通河隄高築三閱月工竣河

歸故道從此不復爲患矣

劉天然節略

人有不以境遇死生動其心者達則可以幹旋天地窮亦可以砥礪廉隅邑之達蒲腰莊邨劉福成字天然名不出里巷而迹其投井一事有足令人歌泣者年七十餘一子一女子外貿易女適閩姓昆仲三人兩弟早殤次弟婦素悍甚際大祲時壻餽麥數斗悍婦攘臂相奪當此之時一粒一珠命爭須臾天然不與較長吁一聲揮之去翌晨出倚杖井旁墜焉其妻偵知

亦從之噫愚夫愚婦義烈同貞此可以厲人心亦可以風末俗矣故誌之

枸杞樹

枸杞爾雅釋木枸櫞卽枸杞也一名苦杞按廣韻春名天精子夏名枸杞葉秋名却老枝冬名地骨皮秋熟色赤服之輕身益氣洵嘉植也產自甘州移種他方極難成高土宜使然縣治戶房院內舊有二株大者闊三尺許高丈許結菓逾萬小者高約八尺邑士冀於淦書房院內植一株高二丈許闊丈許十數年來

結實之大發枝之華迥異尋常而根柢盤結不可以
 歲月計桑冀邨關帝廟殿前亦有一株高丈許枝葉
 葱茂下垂至地相傳四百餘年古物足與介之秦柏
 漢槐相伯仲矣故並誌之以為好古者之一助云
 紅沙厓開修道路事略

邑南三十五里為南山山間有溝溝上有路山口為梁
 家灘前行十里為果則溝東南鄉一帶運炭孔道也
 兩邨之間路西有所謂紅沙厓者高四百餘尺其色
 赤其沙大者如拳小者若豆日夜錯落有聲沙去石

無依如車輪如升斗者纍纍而下無定時其下有小
 道僅通人行一失足即有顛墜之虞且時有覆壓之
 恐人畜往往罹其害嘉慶六年士人郝天命集眾修
 理患稍紓至咸豐九年邨中諸君子從厓左鑿去石
 二百餘尺至河灘開路三里餘由東繞出厓右始即
 舊道迴視紅厓已出百步外矣今則皆為坦途而諸
 君子經營之力為不可沒也諸君子為誰耆賓郝永
 保馬天武武生廣庠生郝春榮監生郝守胡也

儀賓

母元儒明嘉靖年人秉性端方謹恭若虛好善樂施有長者之稱尚慶成安穆王女貞邱縣主

母愧心萬曆年人和以處眾嚴以自勵尚慶成王長女
汴梁縣主封亞中大夫

儀賓補遺

郝 寵貌清體秀生於嘉靖六年尚慶成王女朱氏平

灤郡君

郝世榮生於嘉靖四十一年體貌偉俊心性靈敏尚東
府慶藩王女朱氏號洪靖縣君

梁天德河東府儀賓封奉政大夫 寄藉文水縣

梁俊賢河東府儀賓封奉政大夫 寄藉文水縣

李天賜本省東府慶成王之儀賓

鄧乘龍天啟年人永和府恭懿王之儀賓

仙釋

唐無名祖師自西極來居麓臺山四十年肅宗召至京
叩無名之旨答曰大方造物總持萬變走為日月駕
為雲雷四時行百物生收功於無形者天地之心也
大人御世不煩而治鼓之為太和不識不知而天下

歸心焉者至人之妙也是故上聖得之而無爲彼蒼
燾之而奚言抑何絜絜於細名哉上善其言待若愷
友上元初化詔還故山宋慶厯間砌塔藏之高三百
尺又名麓鏡臺常施眼藥濟人甚有神效僧世其方
淨愨禪師北齊時住百福寺

益公持法蒙山雲和尚參頌曰跛躄痿羸鈍復痴口如
鼻孔眼如眉自從一吸西江盡天上人間更不疑學
士王子瑞黃花老人閒居林下與雲和尚友見益公
公歸晉過學士學士贈之以詩公初剃度於柏山和

尚法名志益承安元年居超山年七十五貞祐二年
坐化筆辭世偈云一片孤雲常自在應時爲雨農家
愛而今七十五年春返本歸山誰作對誰作對無罣
礙朝騎木馬過紅鑪夜跨泥牛入滄海噫

元鑑和尚居東泉下百福寺辭世偈曰撒手歸真覺何
有須彌頂上雲中走翻身打破太虛空海中倒跨泥
牛吼咄

卧如居法燈寺洞達科條無病而寂後多顯跡或見其
於山中乞化宋元之際寺遭灰燼其像端然如故時

人異之因號爲卧如菩薩

龐鶴字翔鸞龐莊人精大小乘年六十七坐化妻女子
同葬老莊之南朝坂劉孝廉嶮遊麓臺山過訪之見
一墓石土人三十年前掘地得者行草書彷彿王右軍
筆意可辨數字莊中普恩寺又有龐公鐵像亦不知
何代人蓋一方之善士非釋氏所稱龐居士也龐居
士名蘊字道元衡州衡陽人唐貞元時謁石頭和尚
後化於襄州

大機和尚自江南來住超山寺寺當歷劫後殘破不庇

風雨公一力修護手自斬伐壘石作城增飾佛舍爲
開山功德第一公徐氏質性雄傑磊砢剛直中山武
甯王苗裔也

明瑞字相生住超山天性通達戒律明徹人見之卽伏
首皈依得法後創南園昭慶寺因住持二十年有語
錄

際得字松野住超山善詩多秀句亦善行楷風流名雅
爲時所重

賀蘭子不知何許人舊傳有仙人賀蘭來過因以名橋

橋在洪善驛東北

于仙亦不知何許人在超山修道製藥引泉水飲人病者即愈今石上猶有字莫辨人謂仙人所遺薛守元唐人住持太平觀重修興造爲一方郡邑之勝

沖虛真人郝志松字善甫居太平興國觀元制贈能仁普濟沖虛真人有碑八分書姚學士樞撰文

清和真人□□□邱長春弟子也居興國觀元掌教大宗師賜號清和真人亦自稱清和子改觀爲崇聖宮即此

論曰昔如終南山訪祖庵觀重陽衍法處何其宏且盛也顧世所傳甘河遇仙及諸真白日飛昇頗涉幻俚今清和真人則爲長春弟子傳其祖教大著宗風梁氏之盛皆其門人餘可知矣李河濱先生曰邱氏北上其有功於中國爲甚大蓋有道君子遯世而有託者因爲詩以詠之有五祖七真事若何大儒遯世道流多黃冠紫綬誰優劣一縷天風吹薜蘿之句余讀元世祖詔長春書知信從之篤非偶然者今觀中斷碣殘石猶可考証一時化導功力上下景從助帝

王刑政之所不逮安得謂非有道仁人者哉

宋清源代州人年七歲出家歷五十年年六十始至平遙睡佛寺僅能識字而篤志修持着布衲茹菜羹澹然自如毫無歧念至平邑以來寺觀廟宇凡所募化修葺創建十有餘處後則狀貌奇異齒落復生至康熙四十四年十月二十三日黎明謂其徒成一貴鄧一林曰明日當回去爾等可急製吾衣裳去時爾等勿哭其徒曰師去望囑遺言曰無夜置衣次日巳時坐化於寺數日其顏如生是年一百五歲

百五歲

書

玉刑政之所不遠安得謂非有道仁人者哉

宋清源代州人年七歲出家形五十年年六十始至平
遙睡佛寺能識字而篤志修持着布納茹菜羹
然自如毫無岐念至平邑以來寺觀廟宇凡所教化
修葺創建十有餘處後則狀貌奇異齒落復生至咸
熙四十四年十月二十三日黎明謂其徒成一貴郎
林曰明日當回去爾等可急製吾衣裳去時爾等
勿哭其徒曰師去黎陽遺言曰無憂置衣裳於已時
坐化於寺數日其顏如生是年

五歲



70010247



